

DISSERTATIO INAUGURALIS MEDICA,
DE

VOMITU CRU- ENTO,

QUAM
DEO PROPITIO
ET

GRATIOSÆ FACULTATIS MEDICÆ CONSENSU,
PRÆSIDE,

DN. D. MICHAELE ALBERTI,

POTENTISS. REGIS PORUSSIÆ CONSILIARIO AULICO, MEDI-
CINÆ PROFESSORE PUBLICO ORDINARIO, PHILOS. NATUR. EXTRAORD.
REIPUBL. NORIBERG. PHYS. ORDIN. ACADEM. NAT. CURIOS.

COLLEGA,

FACULTATIS MEDICÆ DECANO SPECTATISSIMO,
PATRONO, PRÆCEPTORE AC PROMOTORE SUO CUM
HONORIS CULTU PROSEQUENDO,

PRO GRADU DOCTORIS

Summisque in arte Medica Honoribus, Insignibus, ac Privilegiis
More Majorum Solenni obtinendis,

Horis ante . & pomeridianis. d. August. M DCC XVIII.

Publicæ ventilationi submittet

ERDMANN KUPITZ,
SORAV. LUSAT.

HALÆ MAGDEBURGICÆ,
Typis CHRISTIANI HENCKELII, Acad. Typ.

REGISTERED TRADE MARK

VOMITU CRU- ENTO

DEPOSITED

REGISTERED TRADE MARK

DR. D. MICHAEL ALBERT

PRO GRADU DOCTOR

Brunn Kette

The only one to use



PROOEMIUM.



Uam divina sapientia

in tota œconomia vitali emineat, vel ipsa illa observatio abunde testari potest, quomodo corpus animale, adeo extremè corruptibile, instrumentali quadam causandi ratione eò inservire debeat, ne

emortualis & perniciofa corruptio illud invadat atque obruat; siquidem actus illi, qui ad conservationem fragilis hujus machinæ applicantur, tam exquisita proportionem gaudent, ut crassa omnino toti rerum universitati vis atque confusio immitteretur, si tam distinctos atque selectos effectus in tot myriadibus individuorum, tam constanti & quotidiano successu nudis atque crudis corporeis qualitatibus adsignare auderemus; etenim tantus numerus singularium partium, integrum corporis animalis systema constituentium, tam egregio atque exacto ordine comprehensus est, ut nulla illarum otiosa aut inutilis & superflua deprehendatur, quin singulari sua fun-

ctione huic conservatorio effectui apprime inserviat: & cum tam digna atque celebris conservatio, subjecti adeo infirmi, non nisi præparatorio, evacuatorio & reparatorio effectui obtineatur, propterea eò diversa idonea organa in communi illa œconomia vitali obvia quadrant, quæ vero ob genericum suum usum minimè adeo obstricta atque præclusa sunt, ut tantum genericam aliquam utilitatem adjuvent, sed tam elegans inter illa reperitur communio, ut in casu necessitatis & extraordinariis occasionibus, unum alteri in tantum inserviat, in quantum vel aliquale commodum corporis integritati comparari potest: similis sane communio occurrit in organis sensoriiis, quæ animæ rationalis usibus subserviunt, quorum singulares defectus quadantenus ita compensantur, ut cum alio sensu alterius debilitati vel perfectæ abolitioni succurratur: perinde in vitali negotio contingit, ut unius organi functio, alterius defectui inserviat, aut ad minimum unum organon in tantum alteri subveniat, quo in eodem tales operationes administrantur, quæ in hoc ordinariè celebrari debent: inde evenit ut diureseos vitia cum copiosiori diaphoresi suppleantur, aut ut excretio muci per alvum, alia occasione per pulmones aut per nares succedat: nec non ut interceptio & occlusio flatuum in ructus mutetur, & ut fæcum alvinarum catotERICA evacuatio, interdum in anotericam invertatur, ut diversorum parallelorum exemplorum commemorationi supersedeamus. Sed dum hæc meditamur mox memoriam nostram occupat tritum illud & fatis ingenium dicterium, quod in ore Hippocratis & Galeni imo plurimorum Medicorum & Philosophorum reperitur,

ad-

admodum usitatum: quod natura sibi ipsi vias feligat & inquirat & quod ad optima tendat; utpote quæ assertio magis ex observatione, quam speculatione ortum traxisse videtur, siquidem naturæ ordines, limites, processus & effectus ita sacri & arcani interdum sunt, ut ipse eventus & totius operationis nexus de salubritate & rationabilitate ejusdem actus satis luculentum & sincerum testimonium perhibeat: unde *Seneca* olim *quæst. 5.* confessus est: *arcana illa rerum naturæ sacra non promiscue & omnibus patent; reducta & interiori sunt clausa sacrario:* & licet hæc dictæria vulgo naturam universi concernant, i. e. totum complexum spatiosi macrocosmi, tamen veritas eorundem perinde eodem jure ad hominis statum extendenda & applicanda erit; siquidem mutua illa functionum vitalium, naturalium & animalium participatio & relatio eundem sacrum ordinem commendat, qui ad corporis integritatem impetrandam & confirmandam spectat: & quemadmodum in organis corporis humani tam elegans communio est, ita non minus in ipsis actibus atque effectibus excretoriis eadem harmonia deprehenditur; siquidem in eximio illo specimine imminutionis sanguinis, aliquando actuales sinceri sanguinis depletiones obtingunt, nonnunquam superfluous ille sanguis, prævio quodam motu atque effectui resolutorio in substantia & forma inutilis feri eliminatur; ut alia hæc methodus nihilominus eandem utilitatem inferat, quam simpliciores Hæmorrhagiæ imperiunt. Meretur hic eximiæ dignitatis consensus tum partium organicarum, tum effectuum salutarium accuratorem attentionem, quoniam famosa illa accusatio

generis nervosi non admodum nervosa, sed nimis generica est, adeoque spirituosiori & perspicuæ veritati magis consono influxu indiget: illud interim ad longè digniores & evidentiores explicationes subministrandas contribuit phænomenon, quod sub tali communione viarum, organorum, motuum & effectuum periclitantis sanitatis restitutio & confirmatio versetur, utpote quæ conciliatio minime accidentalibus, aut merè morbidis atque turbulentis causis imputari potest. Sed ne in generalissimis talibus disquisitionibus diutius subsistamus, mox in mentem incidit, quomodo tam ordinarii motuum vitalium successus, quam extraordinariæ illæ partium & evacuationum communiones principaliori cura, industria & tenore circa sanguinem occupentur, quippe qui non modo præ omnibus, corpus humanum constituentibus partibus & citissime & facillimè in mortiferam putredinem ruit, sed et sine quo principalior motus vitalis & connexus reliquus salutaris actus & effectus, sanitatis commodo inserviens, administrari haud potest; & ne diffusius commonstremus, quomodo diversi motus & variæ partes sanguinis attenuationi & repurgationi inserviant, ita illam tantum circumstantiam attingere lubet, quomodo diversæ regiones & variæ partes ad exonerationem molesti & abundantis sanguinis applicentur; siquidem natura humana vi illius dominii, quo corpori suo præsidet, ad varia loca hunc suum conatum dirigere potest; inde est, cur impeditæ narium Hæmorrhagiæ denique in Hæmoptysin aut Hæmorrhoides convertantur; aut cur Hæmorrhoides turbatæ & oppressæ, modo è capite, alibi è pulmonibus, interdum è

è ventriculo, aliquando è vesica urinaria, quandoque è superficialibus venis eluctentur, aut actu etiam erumpant; aut cur Menses impediti & perturbati, nunc ad nares transferantur, ut propterea *Hippocrates Sect. V. aph. 33.* dixerit: quod *mulieri mensibus deficientibus è naribus sanguinem fluere, bonum sit*; alibi ad pectus, interdum in hypochondria & ventriculum, aliquando ad loca hæmorrhoidalia &c. dirigantur, quales vicarias functiones hæmorrhagicas passim & veteres & recentiores observatores sufficientibus & luculentis Historiis annotarunt & inculcarunt, quæ animadversiones in Historia & Praxi Medica eximiam utilitatem offerunt, ut propterea non otiosus labor sit, huic Hæmorrhagiarum communioni explorandæ & explicandæ operam & studium adhibere: sed dum hæc disquisitio admodum spatiosa est, ita ad unicam tantum Hæmorrhagiarum speciem animum dirigimus, quæ in Pathologia Practica magnæ dignitatis & existimationis est, videlicet ad Vomitum Cruentum, qui partim cum hæmorrhoidali, partim cum Mensium negotio exactam aliquam harmoniam servat, ut exindè liqueat, quomodo natura nonnunquam ventriculum seligat, ad quem motus hæmorrhoidales & menstruos applicat & transfert, si in genuinis locis & motibus hæmorrhoidalibus atque menstruis anomalix quædam incidunt: Quoniam vero impræsentiarum nobis incumbit, quo Inaugurali quodam Specimine utilem aliquam tractationem Medico-Practicam commendemus, propterea de **VOMITU CRUENTO** seorsim agere & differere proposuimus: Adsit itaque nostris conatibus divina clementia, eosdemque ita adjuvet atque secundet quo salutarem & exoptatum scopum assequantur. §.I.

§. I.

Quando de *Vomitu Cruento* differere constituimus, haud inutile erit, *generalem* quendam transitum ad specialio-rem tractationem præmittere: ubi mox in primo limine *multiplices* illas *vias* considerationi & attentioni commendamus atque proponimus, per quas *sanguis* extra consuetum suum cursum moveri imo denique a toto corpore *removeri* solet: ubi minime infimæ notæ & fortis illa est observatio, quod ut plurimum sanguis ad talem *singularem* perruptionem dirigatur, ut non in *interiora* transfluat & cavitatem cerebri thoracis, aut abdominis oppleat. Sed ad talia loca affundatur, è quibus denique *extra* totum corpus effundi queat: ita in usitatis maximeque cognitis Hæmorrhagiis nares, gingivæ pulmones, interiora asperæ arteriæ superficies, ventriculus, intestinum rectum, vesica urinariæ, uterus ejusque vagina, innotuere; deinde vero observationes testantur de sanguinis profluvio ex oculis, auribus, dentium alveis, mammarum papillis, venulis superficialibus spontè perruptis, è poris cutis, sub unguibus digitorum, e labiis oris & vagina uterinæ, e genitalibus virorum & pluribus aliis, sicut passim observatores hujus variationis mentionem injiciunt, e quibus hoc loco tantum *Zacutum Lusitanum Med. Princ. Hist. Lib. 2. Hist. 10. & Casp. à Reies Camp. Elys. Quæst. 86. §. 8. 9.* ut collectores talium observationum allegamus, ut nihil seorsim de Mensium & Hæmorrhoidum *insolitis* viis inferamus; siquidem interdum miraculosi plane exitus deprehenduntur; ut propterea in ejusmodi casibus ob *defectum* aliarum causarum, *arcani* naturæ actus & *occultæ* viæ salutari & deprædicari soleant: in qua *variatione* partium sane longe magis ex-
qui-

quisita illa *motuum* directio & restrictio, quam confusa & generica quædam *obstructio*, & *acrimonia* æstimationem promerebit: in eo vero maximè elucescit singularis *Dei providentia* atque naturæ benignitas atque *rationabilitas*, ut dum in prædictis *interioribus* cavitatibus longe *exiliora* vasa sangvifera deprehenduntur, nihilominus utplurimum eruptiones *extrorsum* contingant; cum vicissim ex altera illa sanguinis perruptione in interiora *rarissimi* ægrotantium salvari & restitui queant: hinc viscerum *internorum* valde *sanguiferorum* rupturæ tanto certius *lethales* existunt, quo *minus* extravasatus sanguis *educi* potest: quod vero tam multiplex *selectus* locorum pro *Hæmorrhagiis* in individuis occurrat, eadem nobis videtur esse ratio, ac de *moralis* illa intentionum & inventionum diversitate, vulgo dicitur: *quot capita, tot sensus*.

§. II.

Quemadmodum vero plurimæ Hæmorrhagiarum, ab *interna* magis atque *tacita*, quam externa *violenta* causa provenientium, *gradu* variant, ut una alteram *lenitate* superet, tamen nulla sane ex omnibus ita *crassa*, rudis & *impetiosa* observatur, ac *Vomitus cruentus* est; siquidem omnes reliquas evacuationes, in genere spectatas, vomitus *vehementia* & *ruditate* superat, ut exinde facile quisquam hariolari posset, quasi in cruento vomitu *causa effectui* respondere debeat, & non nisi *crassæ* ac *violente* læsiones eundem excitare queant: exinde etiam fluit, cur utplurimum in *ætiologica* illius deductione animus magis ad violentas causas applicetur: sed sane magnam attentionem subinde meretur illa hujus vomitus conditio, quæ sub concursu aliarum *antecedentium*, æque minus impetuosarum causarum, vel ex solo *intimiori* pudore, & *tacita* iracundia revocari potest; aut quando ex aliis *tacitis* causis, sine ullo *strepitu* & *impetu* decurrentibus, generatur, & proinde etiam cum iisdem ita firmiter *coheret*, ut vix

violente causæ hujus *tenoris* & efficaciam esse conspiciantur: ex qua animadversione non sine prægnanti ratione colligimus, quanta discretione *causæ*, ad hunc vomitum contribuentes, sint æstimandæ, applicandæ atque tractandæ; siquidem illi casus, in quibus hæc Hæmorrhagia *violento* modo provocata, sistitur, vix *tantum* laboris & *difficultatis* facessunt, ac ubi *subtiliores* atque *intimiores* causæ eò contribuerunt: ex quo iterum fuit altera notatu digna animadversio, quod in medico-practica, hujus vomitus tractatione, animus non tam anxie in *vomitum* defixus esse debeat, ac potius in illam *interiorem causam*, quæ denique ad hunc *crassum* effectum disponit: inde enim fluunt illæ *antipraxes*, quando pro principali auxilio adstringentia, stomachica, opiata & similia ordinantur, è quorum usu non nisi sinistri effectus provenire possunt, quia *radicem* mali haud satis *accuratè* attingunt: illud vero ulterius pensitationi & attentioni commendandum est, quomodo valde *complicatæ* causæ in hoc affectu concurrant, quæ eundem eo magis *intricatum* atque difficilem reddunt, dum 1) sanguis ex occasionibus *singularis* efficaciam & *sensibilitatis* ad hanc evacuationem promovetur, 2) dum sub *difficilioribus* conatibus intra ventriculum perrumpitur, & dum 3) tam *valido* & *potenti* motu actualis & anxie vomitionis expellitur: utpote quæ genericæ considerationes sunt, quas circa denominationem notare placuit.

§. III.

Sed quo magis in ipsa sua *denominatione* hæc species Hæmorrhagiæ intelligatur, propterea dicitur *Vomitus cruentus*, ex quo primo mox inclarescit, quod sanguis è *ventriculo* expellatur, & per *inversam* illius peristalsin *crasso* modo & motu excutiat: an vero mox *immediate* intra *ventriculum* sanguis perruperit, an vero in *confinia intestina* primum emanaverit, deinde in ventriculum translatus

latus sit, nondum hoc loco, sed *inferius* differere & explicare placet; quia hic respectus ad *causalem*, præsentis Hæmorrhagiæ, deductionem spectat; dum vero dicitur, quod è ventriculo sanguis exturbetur, ita mox hæc Hæmorrhagia distinguitur ab *Hæmoptysi* & *sputo cruento*, licet inter has species *confusio* quædam suboriri soleat, pro qua adumbranda interdum frustra consensus generis nervosi accusatur, quando videlicet in certis observationibus commemoratur, quomodo in subjectis cruento vomitu demortuis, *pulmones* in culpa esse deprehensi fuerint; ubi facile fieri potuit, ut sanguis, è *pulmonibus* profusus, mox *deglutitus* & postea iterum vomitu rejectus sit; vel ut in uno eodemque subjecto & *Hæmoptysis* & *Vomitus cruentus* simul invaserit; vel ut post *præmaturam* largioris Narium Hæmorrhagiæ *cohibitionem*, sanguis *retro* per infundibulum defluerit, & post *deglutitionem* iterum cum vomitu excussus fuerit; vel ut in fæminis, *male menstruatis*, Hæmoptysi correptis, post repentinam hujus oppressionem, tunc demum actualis vomitus cruentus, tanquam *vicaria* Hæmorrhagia exceperit: neque quidem *Hæmorrhagiarum* numero hic vomitus cruentus excludendus est, licet tam *crudo* modo succedat, quemadmodum *dysentericus* fluxus non æque ad Hæmorrhagiarum classem refertur: interim pro priori militat, quod 1) æque sanguis è *minutissimis* venularum osculis perrumpat 2) ita *guttatim* intra ventriculum transfluat, 3) motu *congestorio* eò affluat, 4) *activa* directione ad eundem ut plurimum advehatur, 5) aliis *spontaneis* Hæmorrhagiis *cessantibus* subordinetur, 6) & hisce *restitutis* iterum curetur 7) communiter certo *sexui* familiaris deprehendatur; in quibus circumstantiis admodum discrepat, ne cum vulgaribus dysentericis dejectionibus hæmorrhagiarum numero eximatur: neque etiam malè *cruentus* vomitus vocatur, cum notio *cruoris* singularem sanguinis qualitatem denoter,

& *spiffiorem* illius consistentiam involvat; siquidem sanguis qui hoc vomitu expellitur non ita *fluidus* sed crassior magisque *nigricans* ut plurimum existit; quid quod interdum in forma spiffiorum *frustorum* sanguinis coagulati, in tali copia in ventriculo collecti & à *reliquiis* concoctionis *acescentibus* alterati magisque inspissati dejectitur, utpote qualis *accidentalis* alteratio in vomitu & mictu *cruento* nec non in *Hæmorrhoidibus* præ aliis Hæmorrhagiis obtingit.

§. IV.

Et dum cruenti Vomitus explicationem suscepimus, minimè quidem nos latet, quam *diversæ* illius *species* inter Practicos vulgo commemorantur, ad quas *antiquissimos* medicos minime ita *solicite* attendisse deprehendimus: unde hac ipsa dissertatione potius de *illo vomitu cruento* tractare constituimus, in quo *primario* tales *causales* respectus occurrant, qui *indoli* Hæmorrhagiarum magis quadrant, quod videlicet sub tali vomitu *particularis* & singularis ratio atque *directio* adsit, quo sanguis *superfluus* atque *molestus* vicario hoc actu eliminetur & *imminuatur*: sicut hujus circumstantiæ eximiæ dignitatis exemplum profert *Hippocrates* quando *Sect. V. aph. 32.* dicit: *mulieri sanguinem evomenti, menstruis erumpentibus solutio fit*, quod etiam *Celsus Lib. II. cap. 8.* allegat: neque minorem attentionem meretur *parallela* observatio fide dignorum Practicorum, qui vomitum cruentum, ex *inversis* motibus *hæmorrhoidalibus* ortum, commemorant; de quare conferatur *Illustris Stablius Dissertatione de Motu sanguinis a crasi & viis non pendentibus vitiis*; nec non *A. N. C. Dec. III. An. IV. obs. 102. de Hæmorrhoidibus per vomitum rejectis*; *Hæchstetterus Dec. II. Cas. 5. Dejectio nigra ut pix & sanguinis vomitus absque noxa*: *Platerus Observ. Lib. III. de vomitione obs. 1.* ubi de vomitu & dejectione sanguinis *grumosi & picis instar nigri* tractat, & dicit quod in
il-

illo casu *Hæmorrhoidum* provocationem utilissimam censue-
rit: *Joh. Crato Cons. Lib. 6. Cons. med. cons. 6. de rejectione san-*
guinis melancholici per sedem & vomitum: Gregor. Horstius
Epistol. Medic. Lib. II. Sect. XV. vomitus sanguinis cum deje-
ctionibus nigris. Rhodius Cent. II. obs. 65. vomitus cruentus
cum dejectione bilis atræ: & cum ejusmodi species vom-
tus cruenti ab ipsis solertioribus observatoribus aliis præ-
positæ fuerint, quæ subinde in Pathologia practica dignio-
res considerationes involvunt, ob id ad illas hoc loco ma-
gis animum dirigere placet; præprimis cum fermè nul-
lus peritorum practicorum priorem circumstantiam,
quod videlicet vomitus cruentus cum Mensum vitiis exa-
ctam affinitatem habeat, oblivioni tradiderit: ut ex sola
hac circumstantia nimirum ex exquisita hac medicorum
harmonia & ipsa Historia practica teste elucescat, quo eo
magis advertendum sit, cum reliquæ causæ, quæ vulgo
in Pathologia Practica allegantur, præ hisce rariores & in-
terdum obscuriores esse, observentur.

§. V.

Quo vero hæc vomitus cruenti species, de qua hoc
loco differere animus est, magis innotescat, tunc aliquot
differentes alias cruentæ hujus evomitionis species allega-
re lubet, inter quas illa singularis est sanguinæ evomi-
tionis & interdum intercurrentis complicatæ cruentæ
dejectionis species, qua integris etiam frustis aut grumo-
sis & coagulatis glebis sanguis projicitur in affectu pecu-
liaris conditionis & considerationis, quem vulgo *sublu-*
xatorio effectui adscribere solent, & vocant *das Wehe-*
Thun; oder sich einen Verdriess thun, quod idem est, als
sich verdrehen: ubi contingit, ut homines utriusque *sexus*,
& diversæ etiam *ætatis* non exclusis penitus *infantibus*,
ex gestatione & elevatione *ponderum* aut ex incauto &
inconsiderato motu *flexorio* corporis, in hanc afflictionem
incidant: ubi in maximo hujus calamitatis gradu evenit,

ut sub gravi virium jactura, & appetitus langvore, in summa lumborum regione circa hypochondria spastica sensibilis & dolorifica tensio corripiat, concurrente æstu febrili aliquando mitiori & leniori, aliquando & quidem in subjectis plethoricis vehementiori, quin accedente molesta atque suspecta abdominis tensione aut plenaria duritie, donec tandem sub molestis vomendi conatibus aut insolitis intestinorum torsionibus, vel sursum vel deorsum, vel utrobique sanguis egeratur: præprimis vero tale quid observatur in *infantibus*, qui magna respirandi difficultate obruuntur, & quasi convulsivo *asthmatico* affectu opprimuntur, ut anxiam, operosam & acceleratam respirationem experiantur: subinde aliquando alvusprehenditur ficcior esse, aut plane adstricta & occlusa, sub qua retentione non modo interna angustia major & gravior ut & hypochondriorum tensoria afflictio immoderatio, sed & concursus febrilis exæstuationis, inquietudinis, ariditatis & siticulositatis certior existit, donec tandem alvus liberetur & grumofus sanguis dejiciatur, quod etiam interdum absque prævia tali alvi occlusiones evenit: quo magis vero hypochondria affliguntur, & cardialgiæ superveniunt, imo sensibiles tensiones, & manifestæ quædam hypochondriacæ regionis indurationes accidunt, eo certius denique vomitus accidentes sanguinem talem grumofum rejiciunt, & singularem cruenti vomitus speciem constituunt, de qua hoc loco minimè disseremus.

§. VI.

Ita alterius indolis cruentus vomitus est, quando in subjectis *Spleneticis*, & post diuturnum *infarctum* Lienis sanguis intra ventriculum perrumpit; quippe qui vomitus, licet *periculosior* sit, cum tamen ad nostram tractationem illustrandam inserviat, inferius paulo clarius explicandus erit: interim ab illa specie quam impræsentiarum

rum pertractandam selegimus, non parum *differt*, ut propterea illius differentia hoc ordine annotari debuerit: Proinde aliam vomitus cruenti speciem constituit, quando in subjectis admodum *plethoricis* vel ob frequentem vel ob potentioris & impetuosioris minusque securi *Vomiterii* usum sanguis intra ventriculum *perrumpit*, & cum vomitu denique expellitur; vel quando oblata *corrosiva* remedia sive vulgaria acida, sive *arsenicalia* adeò interiorum ventriculi superficiem & Vasculorum sanguiferorum orificia *excoriant* ut sanguis denique effluat, & in notabili quantitate in ventriculo colligatur ac denique immoderato vomitu expellatur; quem interdum oblata talia corrosiva subjecta eo certius causantur, quo *majori* copia ingesta fuere; cujusmodi exempla passim in observationibus medicis recensentur, ut minimè necessarium reputemus, quo in diffusorem Historiarum conquisitionem, collectionem & allegationem nos immisceamus: illud tantum hoc loco prævia quadam admonitione præoccupamus, ne à tali casu in *ætiologica* vomitus cruenti deductione præceptus ille *saltus* instituatur, quasi horrida illa sanguinis *acrimonia* tam facile ab intra texturam ventriculi *arrodant*, aut quasi *imaginaria* illa faburra *hypocondriaca* & *scorbutica* ventriculi acida, austera, pontica, &c. tam facile *superficiem* ventriculi corrodant, & vasculorum ostiola detegant, quo ita subito sanguis transfluat atque effluat: juxta quem conceptum ejusmodi cruentus vomitus longe *frequentior* esset, ac vulgo deprehenditur: interim negare minime volumus aut possumus, quasi *acriora* pharmaca interiorum *villosam* ventriculi constitutionem adeo *abstergere* & *abraderi* nequeant, quo sanguis ex apertis ventriculi *porulis*, etiamsi nullum venulæ ostium detersum sit, *transudet*, & successive in cavitate illius augeatur, cujusmodi exemplum allegat *Franciscus Glissonius in tractatu de ventriculo & intestinis* de puella ubi in ventriculo nullum

lum vas disruptum repertum fuit, quæ vomitu cruento laboravit, cujus interior ventriculi superficies ab oblato pharmaco absterfa, sanguinem fudit. *conf. Bonettus sepulchreti Anatomici Lib. III. Sect. VIII. obs. 7.* qualis parallelus effectus obtingit in *dysentericis* fluxibus, in quibus ab in-hærente *acriori* inquinamento ita *arroditur* & detergitur intestinorum *textura*, ut sanguis non modo ad *vasorum* orificia effluat, sed etiam a reliqua *textura* corrosa affluat: neque denique de illa vomitus cruenti specie, hac occasione agimus, quæ à *deglutitis instrumentis* acutis & texturam ventriculi *incidentibus*, aut quæ à *vermibus* retentis aut *hirudinibus* deglutitis provenit, quales historias operosius recensere haud è re nostra esse reputamus, cum directè ad propositum nostrum non spectent, interim *Zacut. Lusitanus Med. Princ. Hist. Lib. II. Hist. 9.* & *Lazarus Riverius obs. med. Cent. 4. obs. 26.* conferri possunt.

§. VII.

Cum hætenus *generalem* aliquam *preparationem* ad proximam *specialiorem* tractationem præmiserimus, ita ordo rei postulat, quo *Historiam* hujus cruenti vomitus tradamus, de quo nobis hac Dissertatione sermo erit: propterea mox ordine primum indicandum est, quod hic affectus non cuilibet *sexui* promiscua *frequentia* familiaris existat, sed quod *sequiori* præ virili usitatius obtingat: id quod sedula *observationum* medicarum collectio & conciliatio facile attestabitur, ubi sane inter decem foeminas vix duo masculi reperiuntur, quibus obtigisse legitur: ex qua circumstantia peculiaris elucescit *ratio*, per quam sequior *sexus* ad hanc Hæmorrhagiam magis *dispositus* intelligitur, & facile propterea liquet, quomodo *Mensium* negotium, primaria *causandi* ratione, ad hunc affectum contribuat; unde unanime peritorum practicorum & observatorum est suffragium, quod ex *mensium vitiis* hic vomitus primas suas *origines* capiat: exinde vero iterum ex

Histo-

Historia practica significamus, quod sequiori sexui *ante* mensium *primam* eruptionem & post illorum *ultimam* cessationem cruentus vomitus haud eveniat, sed intra illum temporis *terminum* comprehendatur, quo *Menses* adhuc *fluere* deberent: vix vero hæc Hæmorrhagia *junioribus* facile puellis obtingit, quin potius paulo *adultioribus* & ferme in *medio* termino totius & universi *ambitus* quo *Menses* currere, recurrere & decurrere solent, constitutis obveniat: quando vero mensium fluxus *justa* ætate absolute *cessavit*, non facile invadit subjecta: quod si vero contigerit, ut *præmaturius* menstrua purgatio in foeminis *activioris* animi cessaverit, vel si *circa* legitimum suum *exitum* cum eximia *difficultate* procedat, aut *defective* etiam succedat, interim aliæ *immoderate*, præcipuè *anotericæ* commotiones concurrant, tunc etiam vel *anosiorem* periodum hic cruentus vomitus ingreditur, vel planè Mensium *cessationem* comitatur, tanto magis in foeminis *precipitis* & *impatientis*, nec non multis *patheticis* commotionibus indulgentis, activitatis. Quod si etiam in foeminis *hereditariæ* quædam anomalix circa mensium successum obtingant, tunc evenit subinde ut ætate *juniores* ad cruentum vomitum disponantur: id quod etiam contingit, si puellis mensium *suppressione* laborantibus, *vomitoria* remedia offeruntur, utpote quæ ad *citiores* cruenti vomitus invasionem *viam* aperiunt & *motus* provocant; quales posteriores circumstantiæ in reliqua Historia practica bene discernendæ sunt.

§. VIII.

Dum itaque in vomitus cruenti explicatione *sequior* sexus majorem attentionem meretur, ita in hoc adhuc aliquas circumstantias annotare lubet, & quidem quod in genere ad hunc affectum *activior* & *immoderatiores* indoles contribuat; unde foeminæ *prædominantis* phlegmatici temperamenti non facile huc inclinant; interim

C

&

& *sanguineum* & *cholericum* temperamentum aliis prævalet; licet cum tali reliqua temperamenta commixta esse possint; unde sanguineo - melancholici, melancholico - sanguinei, cholerico - melancholici, melancholico - cholericici, cholericico - phlegmatici, sanguineo - phlegmatici temperamenti foeminæ huc inclinant: requiritur itaque ad ejusmodi *extraordinarium* actum, *major* animi alacritas, quæ licet non statim quoad *externum* impetum manifesta sit, tamen *tacito* & *intimo* suo successu sese comprobatur: hinc tales foeminæ ut plurimum animo *mobiles*, *molles* atque *sensibiles* deprehenduntur, *contumaces* tamen, *impatientes* atque *immorigeræ*; in quibus subinde *inordinati* mores obtingant, quales vulgo dicuntur *heimtisch*, *eigensinnig*, *unartig*; sed quæ præterea ad extraordinarias resolutiones *precipites* sunt, atque facile *excedunt*: neque tantum hi consueti mores in iisdem observantur, sed & singularis proclivitas ad immoderatas *patheticas* commotiones in illis advertitur; unde faciles sunt ad *iracundiam* & illam quidem magis *tacitam* atque *tenacem*, quam impetuosam & *violentam*, nec non ad *desideria* immodica aliasque tales animi passiones, quæ multam *commotionem* inferunt; siquidem non modo ad *primam* hujus vomitus invasionem talia *pathemata* contribuant, sed ad *revocationem* illius apprime satisfaciunt; sicuti hujus circumstantiæ mentionem fecit *Celeb. Stahlianus* tam in *Epist. de Motu Tonico vitali* quam in *Pathologia* sua: illud vero adhuc hac occasione significare volumus, quod hic affectus ad *variores* foeminarum morbos pertineat; quemadmodum præ aliis *communibus* maximeque notis Hæmorrhagiis *infrequentior* existit, ut sua *raritate* propterea *alios* infrequentes sanguinis fluxus *superet*: quam rarus vero est in se spectatus, tam usitatus vero aut *magis familiaris* esse observatur in *fæminis*, quam in *viris*, utpote *distincta* & *eximia raritas* in viris eo magis de

in-

incongrua illius ratione & relatione erga *virilem* sexum testimonium quoddam perhibet, siquidem propterea cum majori *omine* hoc affectu viri laborant, quam *fœminæ*.

§. IX.

Dictum fuit, quod hic affectus *masculinum* sexum *rarissime* omnium occupet, ubi subinde certæ *circumstantiæ* annotandæ sunt, quæ vomitum cruentum in viris *comitantur*: etenim Historia practica testatur, quod non nisi ejusmodi viris evenerit, qui 1) molesto & gravi affectu *hypochondriaco* diutius laborarunt, 2) in quo subinde iniquæ & *incongruæ* tractationes occurrere 3) quæ vel in perversis *artificiis*. 4) vel in turbulento *regimine* & *prava* *dieta* consistunt; siquidem 5) etiam malè ægrotantium *meres* & 6) tacita atque immodica *pathemata* animi, ut iracundia & mœror non parum contribuunt; 7) accedit etiam multa *sedentaria* vita, qua ejusmodi hypochondriaci utuntur, nec non 8) *alvi* frequens occlusio atque 9) *parcus* potulentorum usus; præprimis quando 10) ita affecti valde *nauseabundi* sunt, atque frequentes molestias ex *ructibus* experiuntur, aut quando 11) multum cum *anotERICA* flatulentia anguntur & subinde 12) plurimos suos urgentes cruciatus in *sinistro* hypochondrio persentiunt, qui 13) *irregularibus* & interdum *repentinis* commotionibus corpus exercent, maximè vero qui sub toto hoc statu 14) artificialibus *vomitariis* vexantur & quando 15) in ejusmodi subjectis *frequens* *nausea* atque 16) ventriculi molesta tensio atque *torsio* concurrit, ut & quando 17) ita affecti hypochondriaci homines, interdum *spirituosa* & sanguinem valde *turgescentia* ingerunt, aut quibus 18) fluxus aut motus *hæmorrhoidales* repressi & per *vomitoria* remedia in *hypochondriorum* regionem seducti fuerunt, aut quando viri 19) diuturna *quartana* vexantur, & sub reliqua alvi *segnitie* copiosis *adstringentibus* offen-

duntur, ut tandem in hypochondriis, maximè vero *seni-*
stro ominosa oppletio obtingat, quæ denique sub conti-
nuatione *perverse* medendi methodi, aut sub concursu
animi pathematum in talem perruptionem atque even-
tum definit: & quemadmodum 20) cum *scorbuto* afflicti
viri tales recensitarum circumstantiarum in reliqua sua ca-
lamitate experiuntur, ita interdum vomitus cruentus
scorbutum *comitari* solet; tanto magis vero si *vomitória*
remedia minus consulto offeruntur, sub mali *exacerbatio-*
ne obtruduntur, aut aliquoties etiam inopportunè *re-*
petuntur: ubi 21) minime hanc circumstantiam peculia-
ris momenti omittere aut prætervidere lubet, quando
viri ex *hereditaria dispositione splenetici*, aut *hæmorrhoida-*
les splenetici cum *vomitóriis* & acribus *stomachicis* medica-
mentis offenduntur; utpote quales circumstantiæ, exa-
ctè ad Historiam Practicam spectantes, occurrunt,
quando viri cruento vomitu afflicti conspiciuntur.

§. X.

Deinde de hoc vomitu cruento in *viris* notandum
est, quod communiter *impetuosior* & *acerbior* sit ac in *fæ-*
minis, subinde etiam *diutius* duret, neque ita facile sua
sponte desinat, uti interdum in foëminis *sponte* cessat, pro-
ptereaque *periculosior* existat, cum variæ aliæ *accidentales*
circumstantiæ coincidunt, quæ eundem ominosum red-
dunt: tanto certius vero notabile periculum involvit,
quando sæpius recurrit, in viris, unde *Cardanus in aphorif-*
mumzi Lib. IV. dicit: quod *plures fæminæ, pauci autem viri sine*
periculo ex vomitu cruento periodico evaserint: conf. *Schencki-*
us Lib. III. de sanguinis vomitu obs. 3. quando vero *Hæmorrhoi-*
des suppressas hic vomitus sequitur, tunc vix ita *confestim*
periculosus esse observatur: siquidem singularia exempla
occurrunt, quæ in viris hunc vomitum plane *innoxium*
prædicant, è quibus peculiare illud est, quod *Plinius de*
viro allegat, qui cum *annuo* vomitu cruento ad notabile
seni-

senium pertigit quando *Lib. XI. obs. 38. Hist. Nat.* illum casum proponit de sene, qui cum annuo tali profluvio sanguinis ex ore, *nonagesimum* annum excessit, id quod *Schenkii* l. c. *obs. 2. de vomitu cruento* interpretatur: quemadmodum *Ioachimus Camerarius obs. 155. de foemina* asseverat, quod cum tali vomitu ad *nonagesimum sextum* annum pertigerit: de reliquo vero etiam *Historia practica* testatur quod in foeminis hic vomitus facilius in *habitum* aliquem degeneret & *periodicus* evadat, minus vero facile nedum quidem saepe in viris: quod si etiam à diversis observatoribus vomitus cruentus in viris innoxius deprehensus fuit, tunc singularis circumstantia interdum concurrit, quam proinde ipsi aliquando recensent, sicuti talis historia allegatur in *A. N. C. Dec. II. An. VII. obs. 199. Dec. III. An. VII. & VIII. obs. 212. conf. Zacut. Lusitanus Med. Princ. Hist. Lib. II. Hist. 10. Rasius Lib. 9. continent. tract. 2. c. 2.* ubi ejusmodi exempla plura occurrunt, quibus *salubritas* vomitus cruenti in affectu *splenetico* confirmatur: quanquam hæc utilitas non omnibus exinde affulgeat; *conf. Marcellus Donatus Lib. IV. de medic. hist. mirab. c. 9. &* quanquam contingat, ut in ejusmodi *lienis induratione* superveniens vomitus cruentus talem infarctum *refferet* atque tollat, tamen suspicio manet, ne in *futurum* pravi successus accidant, unde de talibus *Lienosis* *Dodonæus* scribit, quod ex *recurrente* vomitu cruento pereant: uti *Forestus* ex eodem proficitur *Obs. Medic. Lib. XVI. obs. 24. in Schol. scribit Dodonæus se multos cognovisse sanguinem vomitione ex Liene rejicientes, qui pallentes fuere & in quibus saepe numero sinistro hypochondrio tumidus splen manifeste (ut in illo qui sanguinem copiosè ex Liene evomebat) sentiebatur, sed ante vomitionem; nam ex vomitione exonerato jam splene subsederat tumor, nec deprehendi poterat: plerique horum tertia aut quarta vomitione vel etiam frequentiore (multis inter singulas mensibus, ut plurimum intermediis) perierunt.*

Occasione præsentis considerationis de vomitu cruento in *viris* institutæ, notare debemus, quod ob *splenis* affectus interdum viri huic *vomitioni* subjiciantur, sub illa tamen diversitate, ut si tempestivè hoc contingat, haud ita *periculosus* deprehendatur talis vomitus, modo non nimis *sæpe* revertatur: si vero ejusmodi splenis infarctus *diutius* durarunt & tunc denique vomitus ille supervenit, vix aliquam *salubritatem* affert, licet utilitatis cujusdam *simulatio* occurrat, quæ *adultioris* illius infarctus *abolitionem* promittere posset: unde etiam in loco citato *Forestus* dixit: *quibus ex Liene sanguis funditur, raro in prima vomitione deficiunt, sed vel recurrente subinde sæpius vomitione pereunt, veluti cuidam accidit cum tertiæ vice vomitione sanguinis ex Liene utcumque copiosa laborasset, & hic quoque obiit:* sicut de tali vomitu cruento ex *tumore & infarctu Lienis* orto *Schenkius l.c. obs. 5.* confitetur: *tertia aut quarta vomitione vel etiam frequentiori perierunt:* ita enim experientia attestatur quod ejusmodi cruentus vomitus periculosus & præ vulgari foeminarum vomitu sanguinis ominosus sit, qui subjecta corripit, quæ *alio morbo* diu defatigata sunt præcipue quæ diuturno & *corrupto* affectu *hypochoondriaco* aut *splenetico* laborarunt, ubi denique ex aliquo vitio *diætetico*, aut *animi* pathemate sanguis intra cavitatem ventriculi eructat: tanto certius & citius vero hæc evomitio periculum suum infert, quando *prodiga, immodica, anxiosa & impetuosæ* est, quando sanguis *nigricans* instar tenacis *axungie* excutitur, ubi quidem contingit ut præcedens *scirrhus* lienis *detumescat*, sed eo ipso hoc viscus *flaccidam* aliquam debilitatem nanciscatur, dum hætenus adeo distentum fuit; intra quod si denuo *floridior* sanguis affluit, hic vel repente in *stasin* emortualem delabitur, & *corruptionem* putridam concipit, ut præceps periculum imminet, vel pessima *confectaria* inde metuenda sunt, ut vel

recursus ejusmodi suspecti vomitus cruenti vel *tabes hectica*, *œdemata*, *ascites*, &c. vitam abbrevient: ex quo facile liquet, quam *equivoca* sit illa salubritas, quæ ex vomitu cruento in *lienosis* promittitur: ita *Dodonæus obs. 26.* allegat historiam *lienosi*, cui vomitus cruentus obtigit, in quo de mortuo lien *corruptus* deprehensus fuit: contra vero *Rasis Lib. 9. tr. 2. c. 1.* recenset historiam foeminæ *lienosæ*, in qua cruentus vomitus *utilis* observatus fuit. Denique repetita vice commendamus, quod in *viris* ille vomitus cruentus eximiam attentionem mereatur, qui cum *Hæmorrhoidum* fluxu vel *alternat*, vel illius *suppressionem* excipit.

§. XII.

Sed cum ultima hæc observatio paulo curatiorem attentionem mereatur, ita illius hoc loco seorsim mentionem facere placet; videlicet quod *viris* aliquando vomitus cruentus obtingat ex *Hæmorrhoidum suppressione*, imprimis *repente* facta; quando post prægressa molimina *spasmodica hypochondriaco-hæmorrhoidalia* denique *Hæmorrhoides* actu erumpunt & aliquandiu succedunt, si sub hoc *fluxu* repentina quædam incommoda obtruduntur, maxime vero si immoderatiores *patheticæ* commotiones committuntur, unde hæmorrhoidalis purgatio sub reliqua vegeta humorum *commotione* repente *subsistit*, inde evenit, ut sub *immoderatiore* gradu motus *sursum* transeant, adeoque *spasticæ*, tensoriæ, rigidius & sensibilius strictoriæ commotiones denuo *hypochondriorum* regionem invadant, quidquod confestim *alvus* firmiter occluditur; *obrigescunt* extremitates, corripit inopina *angustia* & præcordiorum arctatio, ut frigidus sudor, erumpat & extrema membra *frigescent*; opprimitur *respiratio*, obnubilantur sensus, invadit *vertiginosa* perturbatio, maximè vero angit dolor in *sinistro* hypochondrio, accedit interdum *internus ardor*, concidunt vires, ob-

obscurantur oculi, cordis motus est *durior* & *plenior*, supervenit *nausea*, *torsio* ventriculi, conatus ad vomendum, propensio in *lipothymiam*, denique sequitur ipse actualis vomitus cruentus, sub impetuosius prosecutionibus, qui subinde in tali scena satis diu continuat admodumque affligit: quo *impetuosius* itaque hic vomitus decurrit, eo certius *periculosis* confectariis subjectus est; quo *moderatus* vero in hoc statu procedit, eo minus suspectus est, sed eo magis exinde aliqualis *salubritas* colligi & observari potest: quodsi vero tunc *frequentius* recurrat & sub quolibet recurſu *vehementius* insiſtat, tunc periculo non vacat, licet observatores testimonium suum interponant, quo repetitum etiam vomitum cruentum hæmorrhoidalem ut innoxium producunt atque confirmant: interim illud adhuc hac occasione inculcandum erit, quod hic vomitus cruentus, qui in Hæmorrhoidum *vicarium* subsidium administratur, & in masculino sexu succedit *sensibilior*, mobilior atque *intricatio* existat, quam alter, qui in *sequiori* sexu *menstruæ* purgationis vices supplere debet; ut ita ubique vomitus cruentus in *fæminis* comparativè *benignior* esse deprehendatur; sicut hætenus per plures animadversiones de vomitu cruento in *viris* actum fuit.

§. XIII.

Revertimur iterum ad vomitum cruentum in *sequiori* sexu explicandum, de quo in præcedentibus dictum fuit, quod ratione suæ durationis *brevior* existat, neque ita vehementer insiſtat, nisi hoc in extraordinariis casibus contingat, unde etiam vel *sponte* iterum cessat, sed subinde *facilius* iterum *redit*, ita ut propterea vel in suspectum *habitum* degeneret, ubi fœminæ ita afflictæ vix levi *pathetica* commotione irritantur, quin illius insultantes *apparatus* atque eluctationes experiantur, vel certis *periodis* revertatur; unde tot observationes passim leguntur,

guntur, quæ vomitus sanguinis *menstruum* decursum aut recursum commemorant; aut quomodo vomitus cruentus ob Mensum vitia toties insultet, quoties illud tempus revertitur, quo *mensēs* recurrere & *erumpere* deberent: quam circumstantiam præ aliis in variis locis explicavit *Excell. Stahlius*, quo benevolum Lectorem remittimus; sicut non necessarium esse existimamus, quo multas observationes seorsim recenseamus, quæ de *menstruo* cruenti vomitus recursum testantur, è quibus multis allegamus *A. N. C. Dec. I. an. 1. obs. 95.* ubi demonstratur, quomodo hic sanguinis vomitus per *mensium restitutionem* curatus fuerit, quo ipso subinde veritas aphorismi *Hippocratici*, de hoc sanguinis vomitu differentis, confirmatur: ita *Sal-muthus Cent. II. obs. 3.* ejusmodi frequentem & *periodicum* vomitum recenset; & licet circa illa tempora, quibus *Menses reverti* solent, non semper in foeminis, quibus semel talis vomitus obtigit, *actualis* talis hæmato-emetica eructatio eveniat, tamen *molimina* illa, ad hunc vomitum collimantia, ad minimum *redeunt*, quæ eminentes suos cruciatus exquisite inferunt: & sicut aliæ foeminæ, mensium *defectu* laborantes, circa illa *menstrua* tempora non raro *morbidas* suas afflictiones, cum mensium negotio *parallelas*, experiuntur, ita si ejusmodi mensium *anomalias* vomitus cruenti *molimina* excipiunt, tunc comuniter eadem circa *menstruos* recursum suam tragoediam ludunt, ut posthac facilius plenaria *adsuetudo* in hac Hæmorrhagia occupet: & licet hic cruentus vomitus in mitiori & simpliciore suo decursu in *sequiori* sexu non statim horridus aut *periculosus* sit, tamen si in talem *habitum* degenerat aut *impetuosius* decurrit & recurrit, non absque omni periculo & *suspensione* esse observatur.

§. XIV.

Quod vero *specialiorem* invasionem atque decursum vomitus cruenti attinet, tunc sequentia phænomena at-

D

ten-

tendenda sunt: præcurrunt ut plurimum *inordinatæ* alvi excretiones, quid quod nonnunquam alvus plane ficca & *obstructa* occurrit: deinde antecedunt insolitæ quædam commotiones *tensoriæ* atque *strictoriæ*, quæ successive magis ad *præcordia* tendunt; tandem sese ut plurimum in *sinistrum* hypochondrium dimittunt, ibique *fixius* hærent atque affligunt, ut non modo foeminæ in eodem *sensibiles* dolores experiantur, sed & unà *respiratio* laboret: unde eximia *præcordialis angustia* concurrit, quæ interdum in illum sensum transit, quem exprimunt: es wolte ihn en das Herz abstrucken: & talia *cardialgica* pathemata nonnunquam ita exacerbantur, ut *semi convulsiva* reddantur: angitur inde ipse *animus*, & in regione *hypochondriorum* magna inquietudo percipitur: facies interea *pallet*, oculi *obscurantur*, contrahitur superficies corporis, *obrigescunt* extremitates membrorum & subinde *frigescent*, erumpit sub eximiis angustiiis *sudor frigidus*; alternat quandoque molesta *phlogosis*, pulsus est *durus*; vires eximie *languent*, somnus est *perturbatus* & imminutus: deficit *appetitus*, & si alimenta, imprimis *solidiora*, ingerunt, longe pejus habent & intensiores *angustationes* persentiscunt: concurrunt *cardialgico-spastici*, *hypochondriaco-hysterici* cruciatus; nonnunquam percipitur in regione *ventriculi inflatio* & dolorifica *durities*, ut propterea eandem regionem *attingere* non queant, cum dicant: es thue ihn en so wehe wie Blut-Schwären: aliquando *caput* unà affligitur & quidem *vertiginosa* temulenta & oppletoria perturbatione; accedit denique *nausea* & sensibilis *torsio* ventriculi; interea vero in *superficie* corporis, venæ, quæ ante conspicuæ fuerant, *evanescent*; tandem sub continuatione prædictarum angustiarum & *lipothymie* invalescentis metu sequuntur *conatus* vomendi, quin denique ipse *æstualis* cruentus vomitus supervenit, qui per vices & intervalla repetit & continuat, ut interdum satis notabilis san-

sanguinis quantitas rejiciatur: & hic vomitus tam diu *in-*
sistit, quam diu *angustia* illæ *cardialgica* & *sinistrum* hypo-
chondrium detinentes, continuant: coguntur itaque fœ-
minæ, quo decumbant, quæ quotiescunque corpus *eri-*
gunt, toties non modo prædictas *capitis* afflictiones, sed
& reliqua *incommoda* sensibilius experiuntur: exturbatur
vero sanguis vel in forma *frustorum grumosorum* inter-
dum magnitudinem ovi æquantium, quando vero vom-
itus nimis cito se invicem sequuntur, adeoque *largius* &
celerius sub majori apertura, intra ventriculum facta, san-
guis in cavitatem hujus transfluit, tunc etiam interdum
fluidus sanguis evacuatur.

§. XV.

Sicut hæc familiaria signa sunt, quæ vomitum cru-
entum produnt & comitantur, ita ulterius annotari de-
bet, quod longe *immoderatio* ille fiat, quo magis alvus
occlusa est: quando vero post aliquam moram cessat, tunc
virium defectus aliquandiu continuant; facile vero ite-
rum redeunt, donec hæc tragœdia alia occasione rever-
tatur: illud vero iteratò inculcamus, quod tales fœmi-
næ communiter *mensum vitia* patiantur, sive imminutio-
nem sive plenariam suppressionem; uti interdum in pra-
xi medica talia exempla occurrunt, ubi *Menses* & *vomi-*
tus cruentus inter se *alternant*, licet illi *parcius* magisque
irregulariter decurrant: neque desunt exempla ubi *gra-*
vidis cruentus vomitus obtigit, quorum observatores et-
iam passim reminiscuntur, ut *Salmuthus Cent. II. obs. 54.*
Bartholinus Hist. Anat. Cent. I. obs. 19. A. N. C. Dec. 1. An.
IX. X. obs. 6. & 20. &c. ex quibus aliqua *innocuum* alia ve-
ro *nocivum* talem vomitum producant: interim rarissi-
ma talis est observatio, inter omnes reliquas: neque si-
lent medici de vomitu cruento in *puerperis*, quemadmo-
dum *Hippocrates* hujus phænomeni duplici loco remini-
scitur in *Libr. de Nat. Mul. §. 46. & de Morb. Mul. §. 72. Si*

ex partu sanguinem vomat, hepatis fistula sauciata est & dolor ad viscera procedit & cor convellitur; minime vero placet hoc loco latius de tali vomitu cruento differere; utpote qualis perinde præ alia specie rarior est: illud vero ex observatione medico-practica adhuc adjiciendum est, quomodo interdum suppressi Menfes imprægnationem aliquam mentiantur, ut abdomen intumescat & indurescat, cardialgia & tensoria molestia occupent, quæ à credulis minusque peritis foeminis cum ingravidationis signis confunduntur; affligunt unà conatus vomendi cum multa nausea, donec tandem superveniens vomitus cruentus dolum prodat & omnis spes imprægnationis concidat; qualem Historiam commemorat Hagendornius A. N. C. Dec. I. An. III. obs. 218. de falsa ingravidatione vomitu sanguinis coagulati detecta: denique etiam accidit, ut sub copiosiori sanguinis transfusione intra ventriculum supervenientes motus excretorii, non modo exacerbata sua efficacia sanguinem aliqua quantitate sursum, quadam etiam, uno eodemque impetu deorsum expellant; sicut in cholera morbo bilis per vomitum & purgationem ejicitur.

§. XVI.

Ne vero statim hanc historicam vomitus cruenti descriptionem abrumpamus, superest quo adhuc aliquot Prognosticas animadversiones annectamus, & ita denuo indicamus, quod hæc evomitio sanguinis in foeminis haud ita suspecta sit ac in viris; & licet una aut altera vice hic vomitus in viris non confestim perniciem suam inferat, tamen proximius illa ingruit, tanto citius vero supervenit, quo magis prægressi insultus per famosa adstringentia & opiata cohibiti fuere; hinc ut plurimum excipiunt vel abdominis indurationes & intumescencia, vel atrocissimi affectus hypochondriaci, aut suspecti & periculosi splenetici, vel scirrhi hepatis, vel tabes, icterus flavus & niger, hectica, appetitus perpetuus defectus, œdemata, hydrops &c. qui singuli

guli affectus ut plurimum *funestum* eventum nanciscuntur: quod si etiam contigerit, ut ejusmodi vomitus ex *inversis* motibus *hæmorrhoidalibus*, aut plane *suppressis* Hæmorrhoidibus ortus sit, tunc *melius* signum est, si Hæmorrhoides *redeunt*: quo *sepius* contra & per *brevia* intervalla in viris *revertitur*, eo *periculosior* existit: & si talis vomitus, sive in *viris* sive in *fœminis* per communia *adstringentia* suppressus fuit, tunc facilius accidunt pathemata *cardialgico-suffocativa*, *convulsiva hypochondriaca*, *hysterica* aut *asthmatica*, & contumacissimæ *alvi* oppresiones: Rarissima sane sunt exempla vomitus cruenti *absolute* innoxii, quando illum natura, ut *consuetum* actum administrat, sicut *Panarolus* *Pencost. I. obs. 6.* fœminam allegat, quæ *singulis* Mensibus usque in *Senium* per ventriculum *Menses* evacuavit; & uti similem salutarem cruentum vomitum recenset *Rhodius Cent. II. obs. 94.* quem vomitum si medici *cohibere* voluerunt, ægrius exinde habuit fœmina, misis pluribus testimoniis: ita enim in fœminis non ita *subito* perniciosus est, nisi cum maximo erumpat *impetu* & *immoderate* continuet, ut simul & semel metus mortis adsit, Si tamen *frequentius* recrudescit aut in pravam *habitum* abit, neque tunc unquam à *suspensione* & *periculo* liber est, sed œconomiam vitæ & sanitatis admodum turbat: quod si vero hic vomitus cruentus in fœminis *repente* opprimatur, præcipuè per *adstringentia*, tunc facilius insequuntur pathemata atrocia *hysterica*, *suffocativa*, *strangulatoria*, *convulsiva*, *colico-convulsiva*, *cardialgico-convulsiva*, aut *cachectica* & *hectica*, imo talia *stupende* convulsiva, quæ aliàs Mensium *anomalias* sequi solent; quod negotium latiori deductione explicavit DD. Præses in *Dissertatione de Mensium anomalis convulsivis*.

§. XVII.

Quod in genere attinet iudicium de vomitu cruento, tunc *Hippocrates Sect. VII. aph. 37.* dicit: qui *sanguinem* vomunt, *siquidem sine febre*, *salutare*: si vero *cum febre*, *ma-*

lum, quod iudicium etiam *Celsus* allegat *Lib. II. cap. 6.* & testatur etiam *experientia*, quod vomitus cruentus in affectu acuto longè periculosior sit, quam in alio statu: imprimis vero annotarunt jam veteres medici, quod ejusmodi vomitus, qui circa *criticum* diem & sic dicto *tyrannico* die contingit *lethalis* existat: quid quod illa omnino *periculosa* & suspecta est circumstantia, si vomitui cruento *febris* accidit: proinde ad Prognosin de vomitu hoc formandam illa observatio *Senis* spectat, quam superius produximus ex *Sect. V. aph. 32.* & quam *Celsus Lib. II. cap. 8.* ita repetit: *Mulier sanguinem vomens, profusus menstruis, liberatur*: id quod *Hippocrates* repetit de *Morbis Lib. I. §. 6. text. 11.* *Mulieris sanguinem vomenti, Menses erumpere, bonum*: id quod etiam optimum est indicium: contra vero *quam diu* menses *suppressi* manent, *tam diu* status ita affectarum foeminarum suspectus est, ita ut sub iusta *interpretatione* illa *Hippocratis* annotatio salvari possit, quando *Sect. IV. aph. 25.* dicit: *sanguis sursum quidem, qualiscunque sit malum: deorsum vero bonum, niger subtus secedens*: proinde *experientiae* magis consona est illa observatio, quod foeminae vomitu hoc afflictæ non satis aptæ reperiantur ad *concupiendum*; siquidem ut plurimum *mensium turbæ* negotium *fœcunditatis* turbant, ni specialissimæ & rarissimæ observationes obstant, quo illam referimus, quam *Hippocrates* proponit *Coac. Prænot. §. 3. text. 460.* *in sterilibus & non parientibus sanguinis vomitus ad conceptionem prodest.* Si post cruentum vomitum diu remanet *decoloratio* faciei, *appetitus* languet, status *asthmaticus* detinet, *alvus sicca & stricta* manet, *cibus ingestus angit*, *abdomen induratur*, in sinistro *hypochondrio* *obscuri dolores* aut *tumores* persistunt, *malum* est signum: quando sanguis intra ventriculum *profusus* non sufficienter *evacuatus* est, sed retentus, ut *putrescit*, pessima symptomata accidunt: videlicet *extremæ angustationes*, *lipothymia*, suspectæ *torsiones* ventriculi

li & intestinorum, *frigidi sudores, dissolutiones virium, angor animi, caligo oculorum &c.* de *periodico* denique vomitu cruento practici magis *benignius* iudicium ferunt, quam de *irregulari & exorbitante*: quæ singulæ animadversiones ad prognosticam præsentis thematis tractationem pertinent.

§. XVIII.

Jam vero in ordine ad causalem sive *Pathologicam* vomitus cruenti explicationem progredimur, quam præmissæ Historiæ pressius accommodare lubet: & dum ad *hactenus* explicatam cruenti vomitus *speciem* animum dirigimus, mox in memoriam venit, quod *Galenus de symptom. differ.* dixit, nimirum *vomitum sanguinis non ad symptomata, sed ad opera naturæ reponendum esse*; cum quo dictærio convenit iudicium *Avicennæ fen. 10. l. 3. tr. 3. c. 4.* quando asserit, non *omnem* vomitum cruentum *perniciosum* esse, unde aliquam illius *speciem* pro *actu naturæ*, à causa molesta sese *exonerantis* habet atque declarat quo referri meretur testimonium *Hæchstetteri Dec. 2. cas. 6. Schol. p. 163.* ubi vomitum sanguinis actum naturæ vocat ad imminuendum sanguinem onustum & superfluum directum: & ita etiam bene assequimur, quod juxta antiquissimos & alios medicos hic vomitus cruentus, cujus in *principaliori* respectu hactenus mentionem fecimus, non sit *turbulentus* aut *confusus* actus sed singularis *naturæ* operatio, qua sanguinem *superfluum* & simul *molestum* per *superiorem* corporis regionem eliminare contendit, quando in *catotERICA* illius salutaris excretionem *impedita* fuit: etenim ille *mos* est naturæ, ut dum in *uno* loco atque exitu vel delinquit, vel præcluditur, ad *aliam* partem atque regionem confugiat. Siquidem juxta scholasticum versiculum *mus miser est antro, qui tantum clauditur uno*; quidni natura illa committat? quæ aliàs corpore suo utitur per proportionatos *motus & ordinatos effectus*; unde etiam tam ex-

qui-

quisitis encomiis exornatur, quod sit *benigna*, *sapiens*, *intelligens* &c. ob id non modo in genere exacta communio occurrat inter *Mensium* atque *Hæmorrhoidum* fluxum, & *vomitum cruentum*, sed & illa harmonia etiam ad *specialem* motus sanguinis *progressivi* participationem sese extendit, ut propterea *majori* jure & ratione ad *superius* directorium provocemus, quam ad *tumultuarium* aliquem effectum: eo majorem vero attentionem & considerationem requirit illa circumstantia, quod hic affectus tam *exquisita tempora* fervare & *justis periodis* recurrere soleat, imo quod per *animi pathemata* invitetur & vicissim etiam exacerbetur; quippe quæ conditiones vix facile nudo *corpori* & meris rationibus *physicis* adscribi possunt, ni petitionibus principii se immergere animus sit: neque etiam ipse *locus*, videlicet *ventriculus*, tam facile ejusmodi effectui obtemperat, ni *speciali* restrictione eò motus *dirigantur*, quæ illo respectu nititur, quod *singulari* modo & insolita atque *extraordinaria* ratione sanguis ex eodem expellendus sit: contra vero longe *simplicior* illa est *demonstratio*, quod *Mensium* & *Hæmorrhoidum* fluxus legitime decurrens, teste innumera experientia, *salutaris* sit, quod porro non salutare sit, si *Menses* & *Hæmorrhoides* *supprimuntur*, quod vero suppressis illis *vicaria generica* sit salubritas, si è loco singulariter *consentiente* sanguis effunditur, quem ultimum actum propterea non *corporis*, sed *naturæ* esse concludimus. §. XIX.

Ob id maxime convenit causas *violentas*, cruentum vomitum provocantes, discernere, a reliquis causis, quæ ad certum *scopum* directæ sunt; siquidem nimis imperfecta nobis videtur illa assertio, quasi nuda *regurgitatio* aut confusa quædam *strictura* hanc perruptionem sanguinis intra ventriculum absolvat, dum quoad suppositam *vagam* & *vanam* restagnationem non infimæ dignitatis quæstio movetur, cur æque ex *suppressis* *Hæmorrhoidibus* aut *Mensibus* sanguis in tam *dispositum* locum restagnet, è quo
actu-

actualis perruptio & *præter naturam* retenti illius sanguinis *vicaria* evacuatio contingit: ubi juxta leges *hydraulico-mechanicas* proximiores restagnationes non in *diffitas* sed in *vicinas* partes transeunt: neque etiam *confusa* quædam strictura ad *accuratam* talem extravasationem sanguinis satisfacit, aliàs omnes *hypochondriaci* & *hysterici* patientes, ob *atrocissimos* suos spasmos periculosissimas eruptiones sanguinis, si non æque intra ventriculum, tamen intra reliquam *abdominis* cavitatem experirentur: constat potius ex *Hæmorrhagiarum* negotio, quod *accuratæ* & *proportionatæ* motuum *congestorio-spasmodicorum* applicationes & *concentratæ* restrictiones ad *congrua* loca, eruptioni *facilius* interservientia, requirantur, quando *actualis* effusio sanguinis contingere debet: ex eo etiam distinguuntur *vana* & *vaga* molimina hæmorrhagica quæ in *irregulari* & exorbitante *congestorio-spasmodica* commotione consistunt, à reliquis *regularibus* & proximis motibus hæmorrhagicis: e qua consideratione itaque denuo colligimus, quod ejusmodi cruentus vomitus minime fortuitis atque *turbulentis* causis adscribi debeat, sed quod totus *apparatus* atque *decursus* illius, *rationabili* directorio subjectus sit; quemadmodum non modo in hac Hæmorrhagiæ specie causæ *inter se* exacte respondent, sed & reliqua *phænomena* ad confirmandas causas apprimè quadrant: ad quas animadversiones inter alias, etiam hæc merito accensenda est, ut, dum fœminæ ordinariè ad *menstruas* evacuationes *adsuetæ*, & in negotio hæmorrhagico administrando *habiliores* & *exercitatiores* existant, eadem etiam non modo vomitum cruentum *usitatus*, quam viri, sed & *sæpius* experiantur, ut denique illis *menstruis* periodis cum apparatibus suis recurrat, quibus *legitimus* Mensium fluxus obtingere deberet: propterea etiam hæc Hæmorrhagia in fœminis haud ita *ominosa* est ac in viris, quia hi in Hæmorrhagiis inducendis non *equali* gaudent *capacitate*; qui ob

insuetudinem talem facilius cum hoc *vicario* actu hæmorrhagico in evidentem aliquem *errorem* delabuntur.

§. XX.

Sed quo *consanguinitas* inter *Menses*, *Hæmorrhoides* & *Vomitum cruentum* magis inclarescat, ita memori mente notandum est, quod per Menstruum & hæmorrhoidalem internum fluxum, non ita indiscretim sanguis *in genere* effundatur, sed quod præcipue sanguis *hypochondriacus* ventiletur, qui per diffusam *Venæ Portæ* divisionem profluit; unde per *fluxus* illos tota *Vena Portæ* cum *connexis* visceribus eximiè liberatur & *sublevatur*; vicissim vero per *defectum* horum fluxuum partes & regiones *illæ* admodum offenduntur & nimia oppletione atque molesta oneratione ægre afficiuntur, subinde etiam sub *difficiliori* fluxuum illorum successu *molimina* excretoria, per *illa confinia* decurrunt, ubi *Vena Portæ* dispergitur: si itaque tum *Menses* tum *Hæmorrhoides* internæ *subsistunt*, nullum *simplicius* aut *consultius* auxilium *vicarium* à natura invenire posset, nisi ut sanguinem molestum atque superfluum non ultro retineat, sed ex alio loco, non *nimum* periculo eliminat, & quidem è *tali*, qui perinde cum *Vena Portæ* *coheret*, & *refluum* suum sanguinem *intra illam* transfert; unde contingit, ut si ex ejusmodi parte sanguis evacuatur, æque *Vena Portæ* à nimio sanguine liberetur, ac si *Hæmorrhoides internæ* vel *Menses* procederent; ad ejusmodi partes vero merito referendus est *ventriculus*, qui sanguinem à *cæliacis* arteriosis ramis, intra texturam suam receptum, partim per *vasa brevia* aut ad *splenem* aut in *Splenicam venam*, ordine primùm, partim per *gastricas* venas ad *Venam Portæ* denique transmittit, ut propterea è *ventriculi textura* effluens & per ventriculum expulsus sanguis, illam sanguinis quantitatem imminuat, quæ alias *Venæ Portæ* infunderetur; ex eo itaque accurata illa *communio* elucescit inter vomitum cruentum & prædictos

Etos reliquos sanguinis fluxus, utpote quæ consideratio eo apprimè inservit, quo ulterius confirmemus *genericam* salubritatem hujus Hæmorrhagiæ, aut quod vomitus cruentus non sit *turbulentus* effectus, sed *actus naturæ*, mediante quo *aliqualis* utilitas pro corpore animali intenditur; præprimis cum nulla *distincta physica* ratio & demonstratio occurrat, cur æque molimina illa, ad vomitum cruentum collimantia, ad *illam* ventriculi *regionem* transeant, ubi textura ventriculi *tenerior* est & *perruptio* vasorum paulo *facilius* administrari & impetrari potest.

§. XXI.

Est vero *ventriculus* in illa præcipuè *regione* tenerioris texture, intra quam *splénicæ venæ* propagines disperguntur, sicut illæ ramificationes sunt, quæ (ut cum verbis *Illustris D. D. Stablii in Pathologia* exprimamus) *ad anteriorem partem fundi ventriculi, sub orificio ejus superiore distribuitur & vasum brevium* nomine veniunt: addit prælaudatus Vir: *sive etiam profundius aliquando ex illa ramificatione splénicæ venæ, quam proxime contermina, quæ inter pancreas & duodenum distribuitur*: absolvitur vero hic vomitus cruentus *congrua methodo & convenientibus* motuum directionibus & applicationibus; ubi minime cum illis consentimus, qui hunc effectum *acrimoniæ* humorum adscribere contendunt, qualis nimis crassa & extreme *concentrata* supponenda esset, si ejusmodi *arrosionis* causa esse deberet: quid quod mirum esset, cur non supposita & famigerata talis acrimonia *alias & teneriores* quidem partes, simili corrosione afficeret: unde nimis crassa est illa *Cardani* sententia, qua causam enormis vomitus cruenti exponere fatagit, quando *Libro de causis, signis & morbis no. 69.* dicit: quod enormis sanguinis quantitas evomatur ex *arteria magna*, quæ gulæ incumbit, exesa: id quod etiam ex eodem allegat *Schenckius obs. Med. Lib. III. de vomitu sanguinis obs. 1.* neque etiam ob-

struclionem pro causa illius eruptionis agnoscimus, quæ ob *mortiferas* consecutiones in corpore vivo neque ita *facile* obtingit, neque ita præcociter *supponenda* est; quemadmodum illius *proximior* efficacia ad *causandam* actualementalem perruptionem æque *eximiis* difficultatibus exposita est: ante omnia vero eadem cum *periodicis* vomitus cruenti recurribus & *animi pathematum* concursibus haud facile conciliari potest, nisi *turbulenti* denuo & nihil cohærentes respectus causales accusentur: neque denique nuda sanguinis *pressio* aut *gravitas ponderosa* satisfacit, quo *essentiales* circumstantiæ, ad hanc Hæmorrhagiam spectantes condigne explicentur: qua ipsa brevi declaratione indicamus, quomodo diversæ sententiæ ad præsens negotium non satis quadrent.

§. XXII.

Proximum itaque est, ut commonstremus quibus *positivis*, verioribus, certioribus atque *efficacioribus* mediis hic cruentus vomitus celebretur & absolvatur: primum itaque est, ut perpendamus, quomodo sanguis *intra ventriculum* perrumpat, deinde, quomodo denique *extra ventriculum* protrudatur: administratur vero hæc eructatio sanguinis *intra ventriculum* mediante *motu tonico*, sive *strictorio* & *spasmodico*, qui adeo *exquisite* dirigitur & applicatur, quo sanguis è *textura* ventriculi ad *ostiola* venularum *affluus* hæc non ita *facile* ingrediatur, sed circa illa *restagnet*: hic enim est *proximus* locus circa quem apertura & *eruptio* contingit, videlicet *orificia* illa venularum *intimiorum* ventriculi texturam egredientium, & sanguinem *affluentem* recipientium atque successive ad *Venæ Portæ* truncum advehentium: quando itaque in *confiniis* harum venularum & quidem circa *capaciorem* earundem propagationem hæc *strictura* & compressio *spasmodica* committitur, tunc motus sanguinis in *liberiori* suo *refluxu* impeditur, continuante interea *sufficienti affluxu*: dum
ita-

itaque Venæ Portæ propagines, *membranaceis* tunicis comprehensæ, motui *spasmodico* valde subjectæ sunt, ita tanto facilius tam *exactè* ad ejusmodi venularum *ostia* sanguis è ventriculi tunicis *affluens* congeri & restringi potest: imo evenit in illo casu, quando *Hæmorrhoidibus suppressis* hic vomitus cruentus substituitur, ut in illa insertione rami *splenetici* in truncum *Venæ Portæ*, ubi uno velut antro *hæmorrhoidalis interna* vena eundem truncum ingreditur, aut in illo puncto, ubi in quibusdam subjectis, juxta anatomicorum non infrequentem observationem, *hæmorrhoidalis* talis vena *immediate* in *splenicum* ramum intrat, ut inquam inducta *spasmodica* strictura, non modo *restagnationem* ad loca *hæmorrhoidalia*, sed & simul ad *splenem* & *ventriculum* causetur, ut ex uno horum locorum, sive in *hæmorrhoidali* parte, sive in *ventriculo* eructatio sanguinis expectanda sit; quemadmodum in tali statu interdum *utriusque affectus* pathemata coincidunt, id quod latius in diversis Dissertationibus negotium *Hæmorrhoidale* explicantibus & commendantibus inculcavit D. D. Præses: quando itaque mediante hoc Tono sanguis *propius* ad hæc *orificia* venarum ventriculi *congeritur*, maximè verò in illis ventriculi *regionibus* ubi parietes *tenuioris* compagis sunt, tunc in illo loco *intumescencia* quædam oritur, cui ita *concentratæ* oppletioni & *restrictioni* superveniens *torso* & particularis *strictura* ventriculi circa eadem loca ultimam *dilacerationem*, eructationem, eruptionem & *aperturam* intra ventriculi *cavitatem* inducit, ut sanguis à *tergo* adhuc *affluens* per hanc aperturam *successive*, modo *remissius*, modo *citius* & *copiosius* intra ventriculi *cavitatem* effluat; qui denique in *quantitate* aliqua, *inversa* persistit per vomitum rejicitur.

§. XXIII.

Sicut vero hic totus *ordo* atque *modus* transprimendi sanguinem intra ventriculum *rationabili* quodam *directo-*

rio nititur, licet natura humana in hoc suo negotio *mechanicam* methodum servet, tamen minime adeo *confuse* hæ rationes mechanicæ a nobis proponuntur, neque propterea penitus excluduntur; sed longe alio ordine explicantur, quo *fundamentale* nostrum assertum eo magis in veritate sua, nihil affectata & contorta, sed simplici, ingenua & demonstrativa, elucescat, videlicet, quod hic vomitus cruentus non *tumultuarius*, perturbatus aut absolute *morbidus*, sed *naturæ* actus sit, qui *genericè* ad salutarem scopum prævisus & destinatus est: ita etiam vicissim paulo modestius de ultima *vomibunda* sanguinis, intra ventriculum coacervati, excretionem judicandum est: etenim vix *gravativa* quædam pressio, sanguini *extravasato* imputata, aut supposita & indemonstrativa *acrimonia* cum vomitu illo superveniente conciliari potest, sed cum prior *destinatio* totius negotii cum absoluta tali *excretionem* conveniat, nimirum ut sanguis *superfluus* per Menses & Hæmorrhoides non evacuatus, sed moleste retentus *alibi* exoneretur, ita nuda translatio sanguinis *intra cavitatem* ventriculi huic negotio atque scopo non satisfacit, unde *rationabili* plane directorio denique sanguis per proximam *anotericam* viam mediante vomitu expellitur, quando, illius *tanta* quantitas collecta est, quæ ad hunc *excretorium* crassum effectum satisfacit, quid quod evenit interdum, ut si *majori* quantitate vel ob statum valde *plethoricum*, vel ob *capaciorum* perruptionem & aperturam, vel ob *plurium* ostiolorum venosorum eruptionem, vel ob *graviores* congestionem sanguis intra ventriculum profluit, non modo ita *affusus* ille sanguis per vomitum, sed & per *catotericam* dejectionem ejiciatur: quippe qui mos *naturæ* humanæ non *inusitatus* est, quando *majori* & *impatientiori* imo *impetuosiori* activitate hoc adversum objectum sursum & deorsum illa prosequitur: id quod etiam contingere potest, si sanguis non *immediate* intra ventriculum perrumpit, sed si per *alias venulas*, cum Vena Portæ tamen ratione *motus progressivi* fan-

sanguinis communicantes, intra *proximiora intestina* eructat, ut partim *inverso* quodam peristalseos gradu aliqua sanguinis effusi quantitas, cum *difficiliore* licet effectu & successu intra *ventriculum* transferatur & ex illo denique projiciatur, partim reliqua quantitas cum subordinata *au-ctiori ordinaria* peristalsi per *alvum* dejiciatur: utpote qui modus superfluum atque molestum sanguinem exonerandi, (si singulæ circumstantiæ bene ponderantur & conciliantur,) minime crassis & *turbulentis* causis adsignari potest, sed assertum nostrum eo magis confirmat, quod hoc negotium *naturæ* competat, si *molestum* sanguinem in *commo-dum* corporis eliminare contendit.

§. XXIV.

Et ita sanguis superfluous atque *molestus* præter ordinem & *utilitatem* retentus, atque variis *incommodis* causandis, efficax, illud *objectum* constituit, cujus gratia *vomitus cruentus* suscipitur & administratur, imo tam *convenienti* motu & methodo in tam *selectum* locum transfertur: interim tamen nonnunquam *spissitudo* sanguinis *hypochondriaci*, in Vena portæ varia damna & *pericula* minantis, *remotio-riorem* aliquam materialem causam pro hoc vomitu cruento constituit, quæ impedit, quo minus promptè & *libere* sanguis per *Venæ Portæ* systema progrediatur; siquidem aliàs motus sanguinis, (licet neque *superflui*, neque *spissi*,) per hanc Venam *progressivus*, variis fonticis *difficultatibus* obnoxius est: sed ne præsentē illa spissitudine pericula illa metuendæ *staseos* & putridæ *corruptionis* in funestum eventum abeant, *salutari* etiam consilio natura exitum quærit, & quidem per *ventriculum*, quo depleta & *evacuata* aliqua *spissioris* sanguinis quantitate, non modo Vena Portæ & cohærentes partes quantisper *ventilentur* & liberentur, sed & eo ipso congruum *spatium* subministretur, in quo reliquus spissus sanguis quodantenus resolvi atque *at-te-nuari*, subinde vero *se-& excretoriæ* functiones levare & *facilitari* queant, ne tum *spissæ* tum aliæ *impuritates* remane-
ant,

ant, quæ partim sanguinis *crassitiem* adjuvant & augment, partim aliam *dyscrasiam* massæ sanguineæ inducunt: unde in experientia medica illi casus occurrunt, ut denique sub tali scena afflictionum, cum vomitu cruento colludentium, legitimum *sanguificationis* negotium graviter turbetur: sicut ante exiguas hebdomadas *D D. Præsidi* obtigit ille casus, ubi in foemina, animo activiori & sensibiliore ex tacita & pertinaci iracundia, cum terrore conjuncta, Menses substiterunt, quæ post aliquod tempus exquisita molimina ad vomitum cruentum spectantia patiebatur: cui urgente necessitate concessit *D D. Præses* Venæ sectionem, sanguis vero, qui effluxit, totus pallidus & vix loturæ carnis similis fuit: sicut alia exempla prostant de pessima crasi sanguinis, præter reliquam spissitudinem, quæ in talibus foeminis obtigit, in quibus vomitus cruenti molimina occurrere; ex quibus illud tantum inferimus, quomodo indicata talis sanguinis crassities & conjuncta aut consequens alia labes causa futuri cruenti vomitus evadat: illud vero hac occasione subinde significandum est, quod *plenitudo* sanguinis, ex *retentis* Mensibus & Hæmorrhoidibus collecta, quæ perinde *liberum* motum progressivum per *Venam portæ* impedit, paulo *frequentior* vomitus cruenti causa existat, quam *nuda spissitudo*, quæ citra illarum Hæmorrhagiarum suppressionem acquisita fuit: denique etiam sciendum quod vomitus cruentus, præsentē sanguine *spissiori* paulo *difficilius* succedat, quia necessariæ *congestiones* & *concentratæ* sanguinis restrictiones non ita *accurate* administrari possunt.

§. XXV.

Sed si jam paulo curatius & pressius perquirere volumus, per quas *vias* aut circa quas *venulas* sanguis eructet, ut in *ventriculi* cavitatem pertingat, tunc *Galenus Lib. V. c. 5. de locis affectis* Hepar & Lienem accusat, unde sanguis intra ventriculum transferri debeat: sed cum de *hepate* paulo obscurior sit assertio, siquidem è ventriculo

lo *peculiaria* vasa venosa sanguifera vix *immediate* in hepar abeant, nisi *rarissimæ* quædam observationes *anatomicæ* obstare possint: unde rectius ad *Lienem* respicimus; quoniam vero ex hoc viscere sanguis non *ad ventriculum* profluit, ita potius viæ illæ notandæ sunt, quæ sanguinem *e ventriculi* textura ad *lienis* confinia *revehunt*: quo ordine sese ante omnia *vasa brevia* commendant, quippe quæ subinde illam *regionem* ventriculi egrediuntur, ubi textura est *tenerior*, unde per hanc demonstrationem *anatomicam* concludimus, quod circa hæc vasa *commodius* sanguis intra ventriculum eructare queat: & cum hæc vasa in *sinistro* hypochondrio situm atque cursum suum habeant, ita *molimina* ad cruentum vomitum tendentia sensibilibus sese in eodem loco produnt: & hujus nostri asserti varia *testimonia* producere possumus, siquidem præter eximium testimonium *Exc. D. D. Stahlii*, quod passim partim in *Pathologia sua*, partim in *Dissertationibus de Vena Portæ, porta malorum, de Malo Hypochondriaco - Hysterico, de Motu Tonico vitali, de Hæmorrhoidibus &c.* adhuc multiplicia alia occurrunt, & merentur hoc loco commendari observationes in *A. N. C.* ubi Scholiastes observationis 350. *Dec. I. An. 3.* dicit: *sanguinem e Vena Portæ per Lienem & vas breve in ventriculum regurgitasse puto: confirmat id autopsia, Thonerus enim profert Historiam ex Valverda desumptam Lib. II. p. 140. de cardinale Cibone, qui hoc malo extinctus: aperto cadavere, ventriculo compresso, Lien turgescibat; è contrario Liene compresso, copiosus sanguis ad ventriculum regurgitabat. conf. Scholion. observationis 314. ubi hæc extant verba: puto itaque Lienem è vena portæ per vas breve hancce sanguinis copiam in ventriculum derivasse conf. An. 6. & 7. obs. 48. in Scholio, Dec. III. An. V. & VI. obs. 257. missis pluribus testimoniis, qualia passim in Boneto, Höf-fero, Valverda, Thonero, Bartholino, Michaële, Wedelio (ut Löwius indicavit) occurrunt: & si per hæc brevia vasa non perumpit sanguis, fieri tamen potest, ut per *alios ramulos* venosos e ventriculo in *venam splenicam* transeuntes sanguis perumpat: ut non æque necesse sit ad *arteriarum* aperturam confugere: illud vero exinde inferimus, quod cum *spasmodicæ* commotio-*

F

nes

nes in *hæc loca* maxime transeunt, ita etiam in hisce regionibus sensibiles illæ *angustationes* & *oppressiones cardialgicæ* contingant.

§. XXVI. Quemadmodum vero *viæ* & exitus naturæ variis modis atque occasionibus *discrepant*, ita solertes observatores annotarunt, quomodo sanguis, qui denique per cruentum vomitum eliminatus est, in *aliu*m locum, quam in ventriculum, eructaverit, è quo denique intra illum transmissus ultimam evomitionem expectavit atque subiit: unde observationes quædam occurrunt, quæ testantur, quomodo ad *gastrica vasa* juxta *Blancardum* & *Theodorum Craanen* intra ventriculum eruperit, aut quomodo juxta *Franciscum Sylvium* & *Ettmüllerum* ex vitio *pancreatis* sanguis intra *duodenum* intestinum erumpat, ut propterea *Sylvius Lib. I. cap. 15.* asserat, quod *sanguinis vomitus non à Liene, non ab Hepate, non à Mesenterio, sed à solo Pancreate deducendus* (quippe quæ sententia opinioni *Sylvianæ* magis quadrat, & ab *Ettmullero* in *favorem* *Sylvianæ* opinionis propagata est) interim *B. Ettmullerus* illo loco ubi de vomitu cruento agit, asserit quod ex apertura *vasorum brevium* intra ventriculum sanguis transmittatur: addit vero quod *una alterave vena à lymphæ pancreatis p. n. acidiori exesa aut aperta, sanguis in duodenum refundatur, qui in stomachum regurgitare debet*; sed cum *viæ illæ* adhuc *obscuræ* sint, per quas *pancreas* cum *ventriculo* aut *intestino duodeno* per motum sanguinis *progressivum* communicare debet aut potest, (ni *rarissimas* observationes quisquam producere & allegare vellet) ita ad minimum hoc assertum in *dubio* relinquimus: proinde vero alia testimonia inter medicos occurrant, quæ asserunt, quomodo sanguis per *vasa meseraica* intra intestina erumpat, uti juxta *Horstium*, *Blancardum*, *Stalpart van der Wiel* *Löwius* in *A. N. C. Dec. II. An. VIII. obs. 125.* documentum producit: interim hujus contrariam sententiam non amplectimur, qua *dubiam* reddere conatur illam viam, ubi circa *brevia vasa* sanguis intra ventriculum perumpit, licet *Diemerbræckius*, *Bohnius*, *Bartholinus*, *Lowerus* & *Blancardus* nobis assentientibus, asserant, quod *superfluous* sanguis per *vasa brevia* à ventriculo re-

ve-

vebatur, neque ex hisce retrogrado fluxu ordinariè ad ventriculum feratur: cui dubio superiores nostræ demonstrationes abunde satisfaciunt. Illud vero hoc loco, ubi in *anatomicas* animadversiones animum nostrum dimisimus, notare lubet, quomodo accuratiores viri in subjectis, vomitus cruenti fluxibus, motibus & apparatus obnoxiiis, *vasa brevia* eximiè turgida & inflata deprehenderint; ex quibus observationibus confirmamus superius allegatam viam sanguinis per hæc *brevia vasa* intra ventriculum eructantis; quales observationes proferunt *Stahlius in Disput. de Vena Portæ Portæ malorum* p. 28. 29. *Wedelius in Physiologia reformata A. N. C. Dec. I. An. IX. & X. obs. 20.* quo spectat modo citata observatio 257. *dec. III. An. 5. & 6.*

§. XXVII. Et dum sanguis mediante hoc toni augmento versus ventriculum congeritur & restringitur, communiter *inferiores* abdominis regiones unà *constringuntur*, quo minus sanguis dispergatur, sed eò *proximius* ad ventriculum transferatur; unde *alvus* occluditur & strictoriæ atque *angustatoriæ* commotiones *hypochondriorum* regionem occupant: hinc illæ inquietudines *angustatoriæ*, *cardialgicæ*, imo concurrentes *inflationes* & *indurationes* ut & sensibiles dolores *tensorii*, *distensorii* & *ardentes*: & cum pro efficaciori interna sanguinis perruptione ab *externa* & *extrema* corporis peripheria restrictio *tonica* sanguinis *ad interiora* administretur, hinc illa *superficialis* obrigescentia, impallescentia, refrigeratio aut tepor: imo cum ad *extraordinarium* & insolitum hunc actum *vires* applicentur, hinc ille virium in *voluntariis* motibus applicandarum *langvor*: quidquod evenit, ut sub vehementiori & *impetuosiori* sanguinis restrictione ab *inferioribus* regionibus in *superiores* succedente, unà *caput* occupetur, & *copiosiori* sanguinis quantitate *oppleatur*, unde *vertiginosæ* & *oppletoriæ* illæ perturbationes: proinde particulares illæ ventriculi *torsiones* venarum *distensiones* lienis *intumescentiæ*, plexus membranacei *mesenterici* spasmodicæ *constrictiones*, variis dolorificis sensationibus, ansam præbent: & dum tam in *confiniis* ventriculi, quam in *ipso* ventriculo ejusmodi *tonicæ* stricturæ succedunt, ita non modo *respiratio*

difficilis est, sed post qualemunque *cibi* ingestionem *angustia* augentur: præterea cum naturæ intentio est *è ventriculo* extraordinario quodam actu aliquid *molestum* egerere, ita *appetitus* rationabili consilio *dejectus* est; id quod firmum testimonium existit, quod *hec tempore* ventriculus ad *aliud negotium* applicari debeat: quod si etiam contigerit, ut *diuturnus* infarctus lienem detineat, tunc quidem ex qualicunque *impulsione* inducta denique sanguis intra ventriculum erumpit, ut superveniente reliqua sinistri hypochondrii *strictura*, oppletio illa *è Liene* transferatur, & ita infarctus ille *referetur*, aut præter naturali *retrogrado* motu per vasa brevia, *valvulis* destituta, in quibusdam subjectis *immediate* intra Lienem inserta, *è Liene* intra ventriculum *inverso* ordine hætenus contentus sanguis adversæ crasseos & consistentiæ dimittatur; haud vero *Bartholini* sententiæ assentimus, quando *Hist. Anat. Cent. 3. hist. 36.* asserit: quod Hepar per porum choledochum & sanguinem & bilem mittat: quod assertum non nisi *possibilitas* tueri videtur, dum loco bilis per ductum *hepaticum* sanguis affluere & per *choledochum* ductum denique intra intestinum *duodenum* penetrare, & tunc demum in ventriculum transferri possit: qui modus nimis *diffusus* est, adeoque magis in *speculatione* & *possibilitate* quam in *observatione* & *usu* consistit. Quo vero denique natura humana cum sanguine *superfluo* exitum per *ventriculum* quærat, concurrunt interdum causæ quæ *affluxum* sanguinis *ad ventriculum* provocant; quo præcipuè *aeria stomachica* & *emetica* remedia referre merentur.

§. XXVIII. Præter opinionem præsens nostra tractatio excrevit! & licet adhuc variæ utiles animadversiones restent, quæ hætenus prolatis & commendatis nostris historicis & pathologicis vomitus cruenti explicationibus adjungi possent, tamen tempus & dissertationis ambitus requirit, quo abrumpamus, siquidem in hac deductione ut plurimum circa *palmariam* vomitus cruenti speciem occupati fuimus, licet reliquas *connexas* observationes non penitus sicco pede pertransiverimus: interea ulteriorem & specialiore præsentis nostræ tractatio-

ctationis illustrationem æquo & benevolo Lectori relinqui-
mus: ultimum superest quo ad *Practicam* vomitus cruenti
commendationem descendamus, quam iterum haud ad *gene-
ralem* respectum applicamus, sed ad hanc præsentis Hæmor-
rhagiæ *speciem* dirigimus, prout *præmissis* nostris tractationi-
bus respondet; videlicet indicabimus quomodo ille vomitus
cruentus *medico-practica* methodo tractandus sit, qui ex *Men-
sium* & *Hæmorrhoidum* turbis originem suam trahit: quo vero
meliori ordine hæc tractatio & consideratio proponatur, pri-
mo loco significabimus principales *cautelæ practicas*, in
hoc affectu observandas. Cavendum propterea est ne *incongruæ*
sanguinis missiones *artificiales* ordinentur; imprimis ne nimis
fugitivè *curatoriæ* VSnes commendentur, imprimis quando
nulla necessitas urget: inde enim *molimina* ad vomitum cruen-
tum tendentia, ita disponuntur, quo *facilius* atque citius *recur-
rant*: tanto minus vero consultum est ejusmodi VSnem in *supe-
rioribus* regionibus corporis injungere aut admittere, siquidem
cum illa non modo Mensium & Hæmorrhoidum *suppressiones*
confirmantur, sed & *hypochondriorum* & *pectoris* oppresiones
acerbiores invitantur: deinde abstinendum est à qualibet alia
fortiori, copiosiori & impetuosiori *evacuatione*, tum *anoterica*,
tam *catoterica*, hinc *vomitória* cane pejus & angue fugienda sunt
tam pro curatorio, quam pro præservatorio scopo: quemad-
modum etiam positiva *purgantia* evitanda sunt: nocent vero et-
iam vel negligentiores *ordinariarum* evacuationum promotio-
nes, vel actuales *suppressiones* & perturbationes: porro absti-
nendum est à *præmaturo* usu *adstringentium*, tanto magis *potenti-
um* & famosorum; non minus etiam *frequens* & *liberalis* illorum
usus evitandus est: omittantur remedia *acria* vias & humores
valde *commoventia* & sic dicta *calefacientia*: seponatur *præmatu-
rus* usus *stomachicorum*, calefaciente sua qualitate *affluxum* san-
guinis *ad ventriculum* immoderatus provocantium: nocent
vulgaria opiata & suspecta alia *narcotica*, quæ indolem Hæmor-
rhagarum magis *turbant* & pervertunt: seponatur *præmaturus*
volatilium usus, quæ motus magis *augent*, quando jam gravius
exacerbati sunt: absint *refrigerantia*, suspecta *incrassantia* & qua-

litercunque ventriculum ægre afficientia: nocent *copiosæ* medicamentorum ingestiones, quæ semel *commotum* ventriculum magis offendunt, obfunt *promiscuæ* *specificorum* oblationes, nec non majores Mensium & Hæmorrhoidum *perturbationes*, aut negligentiores horum fluxuum *promotiones*, ut & roborantium nimis *concentratorum* & acrium ingestiones; nocent *præmaturæ* vomitus suppressiones quando adhuc multa sanguinis quantitas *in ventriculo* latet. Denique obstat incommodum *regimen* quoad animum & reliquū vitæ genus: utpote quæ potiores cautelæ practicæ sunt, quæ ad præsentem affectū referri merentur.

§. XXIX. Proximum nunc est, quo *positivam* vomitus cruenti curam indicemus: ubi mox illam practicam quæstionem movemus, an ita *absolute* necessarium atque utile sit, quo in hoc affectu *VSio* administretur? etenim hæc *artificialis* sanguinis subtractio *commune* illud refugium est, quo in *nimis* Hæmorrhagiis, tanquam ad sacram anchoram practici properant: nos quidem ex suffragio *experientie* asserimus, quod ejusmodi *VSio* minime ita *indiscretim* necessaria atque utilis existat; siquidem vel *remissior* affectus status eandem non urget, vel *aliis methodis* interdum natura obtemperat; quodsi vero *prima* hujus vomitus eructatio valde *enormis* & ulterior illius continuatio admodum *immoderata* comparuerit, tunc pro *impetu* hoc mature *coercendo* *VSnem* minime dissuademus, etiamsi *curatorie* instituat: præstat vero *in pede* venam aperire & moderatam sanguinis quantitatem educere: quando vicissim *in brachio* sanguis subtrahitur, tunc vel *VSio* plane *nihil* levaminis affert, vel *majorem* hypochondriorum & pectoris *oppressionem* præsentaneam inducit, vel Mensium & Hæmorrhoidum *obstructionem* confirmat, vel frequentiore & *citiore* hujus vomitus *recursum* invitat, vel plane alium *corruptum* morbum post se trahit: Quodsi itaque *urgente* necessitate *curatoria* talis *VSio* administrata fuerit, tunc invigilandum est, quo post aliquam moram *præservatoria* artificialis sanguinis ventilatio substituat, ne *brevi post* suspectus cruentus vomitus *recurrat*; siquidem *acceleratam* talem repetitionem spontaneæ Hæmorrhagiæ *curatoria* *VSio* inducere solet. Deinde in primis vomitus cruenti limitibus & Therapiæ initiis providendum est, quo excretio *alvina* libera sit atque facilis: tanto magis vero convenit alvum occlusam atque strictam *reserare* & *lenire*: sed dum præsentem vomitu cruento remedia *alvum aperiencia* minimè *oretenus* exhibenda sint, nedum quidem exhibita proficiant, ita potius *clysterum* usum commendamus, quales in hoc statu *lenientes*, *oleosi* & *remissius* stimulantess esse possunt, quibus mediantibus *diversio* quædam ex *hypochondriorum* regione inducitur: abstinendum vero est, ne *clysmatibus* *acriores* species commisceantur, licet *temperatissima* roborantia subiecta combinari queant.

§ XXX. Quando hisce obstaculis medela aliqua oblata fuit, tunc ad ipsum affectum *propius* accedendum est, quare prima intentione motus illi *congestorii spasmodici* excretorii *temperandi* sunt, hinc pulvilli teneriores & quantitate exigui *Nitrati absorbentes cinnabarini*, ita dicti *antispasmodici* aliquoties per diem exhibendi conveniunt, quemadmodum mixturæ ex aquis Plantaginis, urticæ minoris, Portulacæ, Scordii, C.B. Ceras. nigrorum, Oculis cancerorum, Coralliis rubr. præp. & Nitro tabulato paratæ, eandem utilitatem promittunt: proinde *leniente* & simul *temperante* efficacia sese comprobant decocta ex rad. Cichor. Scorzon. apii. hordeo excorticato, fl. chamomillæ passulis majoribus & nitro: quippe quæ auxilia leniori & mitiori methodo *immoderatas* illas spasmodicas commotiones mitigant, ut non æque ad *positiva* adstringentia aut *sedativa* remedia confestim confugiendum sit: quando vero hæc sanguinis excretio *immoderatus* insistere videtur, tunc accessus instituendus ad *cobibentia* & *sedantia* remedia, quæ tamen ita *selecta* esse debent, ne *suspectè* *simultaneo* effectu hunc vomitum obruant & opprimant: & horum auxiliorum dantur *duo genera*; quædam, quæ *specialiori* efficacia motus *immodicos spasmodicos* circa *Venam portæ* favientes, compescunt atque retinent, quo nomine *Millefolii* herba ab *Illustri D. D. Stahlio* ex sufficienti experientia laudatur, quæ vel in *Decocto*, vel in *Essentia* usurpata immoderatum talem vomitum refrænât; siquidem cum *Essentia* *Millefolii* alia *Essentia discutiens*, *resolvens* & modestius *roborans* combinari potest; quo nomine commendamus *Essentiam Pimpinellæ albæ*, aut *Helenii Caryophyllatæ*, *Cort. aurantium* &c. qualis *Essentiarum Miscela* bis vel ter per diem ad 30 vel 40 gt. assumi potest: ad *vulgaria* vero *tonica* referimus *Crocum martis antimoniatum Stahlii*, *antimon. diaphoreticum martiale Ludovici*, *Tincturam vitrioli martis Tartarifatam Ludovici*, *Tincturam Martis Tartarifatam*, *Tartarum vitriolatum martialem*, *Liquorem mineræ martis Hassiacæ*, *Tincturam stypticam ex vitriolo martis cum Spiritu vini paratam*: quo in casu necessitatis *Tinctura Corallorum* & de *Catechu* referri potest: cavendum vero est ne talia deobstruentia statim sub *primo* hujus vomitus *initio* ingerantur, neve *largis* aut *frequentibus* dosibus ordinentur; aliàs sanguis effusus intra ventriculum occluditur & majori quantitate retinetur, qui illic putrescere inchoat: præstant *ante* horum oblationem remedia *temperantia* præmittenda, & *sub* illorum usu atque *post* illum *continuanda*; ita eo magis suspectæ internæ stricturæ præoccupantur.

§ XXXI. Et quo certius atque efficacius ejusmodi *impetuosus* vomitus cruentus mitigetur, præstat interdum *selectum* quoddam *sedativum* remedium offerre aut reliquis conjungere: haud vero famosa & communia opiata remedia intelligimus: præferimus prælaudata *cinnabarina*, nec non *Corticem chaccarilla*, quem in pulvere cum absorbente medicamento, aut coralliis rubris præparatis aut C. C. usto commendamus; non minus *Tinctura Chaccarillæ* cum *Essentia Millefolii* mixta confert: quibus hic cortex deficit, illi *Massam Pill. de Cynoglossa* in usum trahere possunt: *Castoreum* pro interno usu non utile deprehendimus, quod vero magis ad *externos* usus reservamus: in *mitiori* vomitu cruento *species de Hyacintho* cum corall. rubr. præp. & cort. chaccarill. *tonico sedativo* effectu præditum remedium constituunt: ita *speciali* *strictorio* effectu in hoc affectu pollent succi ex *millefolio*, *urtica*, *Polygono*, *Equiseto*,
Pim.

Pimpin. sanguisorb. parati conjuncti cum extracto chaccarillæ: præterea ad diversionem instituendam conducunt *pediluvia* & *frictiones* pedum: *Forestus lib. 16. obs. 24.* recenset quod cum solo *Clystere* hunc affectum in foemina curaverit: Et quanquam a Practicis *externa* auxilia, quæ communiter de *adstringentium* profapia sunt, commendentur, tamen illis haud indigemus, quando præmissa remedia dextrè usurpamus: interim in *sensibilibioribus* subjectis vix penitus *topicis* talibus remediis efficaciam denegamus: sicuti præter talia adstringentia etiam moderata *roborantia* cum *castoreo* remixta admittimus: quando vero hic vomitus quantisper *remittere* videtur, tunc subjungenda est illa Mixture *roborans* ex spiritu C. C. & Tinct. antimon. Tartarifata composita: quemadmodum circa *finem* curæ eo respiciendum & allaborandum est, quo sanguis, qualiscunque adhuc vel in *ventriculo* vel in *intestinis* hæret, tempestivè per moderatam *laxationem* evacuetur, quo commendamus usum Rhabarbari, extracti panchymag. Crollii, aut pillularum remisius aloëticarum: proinde etiam hoc tempore usum temperatorum stomachicorum remedium admittimus: eximie utilitatis & dignitatis in hoc affectu sunt *Pillulæ balsamicæ Stablianae*.

§. XXXII. Quando vero vomitus cruentus *præservari* debet, tunc ante omnia prudens & securum auxilium adhibendum est, quo *Menses* vel *Hæmorrhoides* revocentur: haud vero convenit hunc respectum *impetuose* & *importune* prosequi, quin potius quælibet *moderata* methodus injungenda erit: ob id *præservatoriae VSnes* in *pede*, *pediluvia*, *frictiones*, *inseffus*, *hirudinum* applicationes ad loca hæmorrhoidalia admodum conferunt, *alvus* conservanda est in *justa apertura*, quid quod interdum admonenda & *provocanda*: ante omnia etiam bona *animi continentia* atque temperies commendanda erit, siquidem hic affectus & citius & facilius per *animi pathemata* excitatur: *Dieta* sit *mollis*, *tenuis*, *eupepta*; potus adhibeatur *sufficiens* atque *tenuis*, minimè vero spirituosus & concentratus: subinde conferendum *mobile vitæ* genus; cum vicissim nimia desidia hunc affectum exacerbent, aut confirmet: *acidularum* usus huc *directè* non quadrat, nisi *spissitudinem* sanguinis quantisper emendare possit: maximum commodum est quo *Menses* aut *Hæmorrhoides* restituantur. Et si hætenus laudata auxilia in usum congruum trahuntur, non opus est aliis *specificis* remediis sanguineis fluxibus opponi solitis, ut sunt dens Hippopotami, Lapis Manati, Priapus Ceti: de reliquo à singulis illis occasionibus sedulo abstinendum est, quæ ad *immodicas* sanguinis *commotiones* concitandas faciunt: minimè vero consultum est *adstringentia* remedia ad *futuros* usus reservare neque *martiales* famosas Tincturas juxta consuetum morem continuare, sed sedulo prospicere, quo *ordinariæ* excretiones justo & libero *successu* gaudeant: quod si vero incommoda quædam sanguinis *spissitudo* in individuis occurrat, tunc præter præservatoriam *Venæ Sectionem* & usum sufficientem *potus* atque *motus*, amaras, & ita dictas *antiscorbuticas* species, ordinamus: & licet in hac practica vomitus cruenti explicatione adhuc una & altera *specialior* circumstantia notari potuerit, tamen in hac *fundamentali* commendatione acquiescere placet; hinc vela nostra contrahimus: Deo vero benignissimo, fatori & auctori veritatis, devotissimas grates tribuimus, quod ad præsentem tractationem vires & intellectum concesserit; cui etiam hanc nostram opellam humillime consecramus, insuperque rogamus, quo eandem gratia sua ita prosequatur, ut ad vota nostra gloriam divinam augeat & proximi commodum promoveat.